

Yuwarwar

Yesu Kristu beɓeɓ mata banare niɓ Yon ikala iriɓ

1 ¹Be, asaɓ kaɓ hime gabe kame mata forok yenayiɓ goyen Yesu Kristu beɓeɓ nikala nirkeb gago kaɓ hime. Al Kurun beɓeɓ mata heɓ ga moɓ forok yiniɓ tahaɓ goyen meteɓ marmini yikala yiri yeɓ Yesu momoɓ iriɓ. Irkeb Yesu Kristu beɓeɓ meteɓ marmini kurab ne Yon gayen momoɓ irayiɓ yeɓ miyoɓmini hulyaɓ irke waɓ momoɓ niriɓ. ²Nebe Al Kurunyen mereya Yesu Kristu beɓeɓ tagalde hinhin mereya kurun goyen delner yeneɓ hinhem geb, goke al momoɓ yirde himyen.

³Ningeb al kura mata kame forok yetek goke yitiɓ gayen kapyan hinayiɓ mar gobe Al Kurun beɓeɓ guram yirde tareɓ yiryen. Irde mata kame forok yetek goke yitiɓ gayen kapyan heke nurde gama irde hinayiɓ marbe Al Kurun beɓeɓ guram yirde saɓiɓ yiryen. Gobe mata goke katiɓ gwahade po heɓ ga ma forok yiniɓ tahaɓ geb, gago diniɓ hime.

Yon beɓeɓ taun 7 bana Yesuyen alya bereya haɓ goyen goke asaɓ kayyiɓ

⁴Be, ne Yon beɓeɓ deɓ Yesuyen alya bereya Esia^a naɓa bana niɓ taun 7 bana haɓ mar goyen goke asaɓ gago kaɓ hime.

Be, bikkeɓ hinhin, haɓka hi, irde kame wayyen al Al Kurun beɓeɓ buniɓeɓ dirde bitiɓ yisikamke igiɓ hiwoɓ yeɓ gusunaɓ irde hime. Irde Holi Spirit mata wukkeɓ wor po 7 miniɓa^b gore wor gwahade po dirwoɓ yeɓ nurde hime.

⁵Irde Yesu Kristu wor buniɓeɓ dirde bitiɓ yisikamke igiɓ hiwoɓ yeɓ nurde hime.

^a **1:4** Esia naɓa gobe gayenter niɓ Esia naɓa kurun goke ma yitiɓ. Gayenterbe Turki inen haɓyen. ^b **1:4** Namba 7 gote miniɓe Al Kurunyen asaɓdebe bulun kuram moɓ, wukkeɓ wor po goke yitiɓ.

Yesu Kristube Al Kurunyen mere binde mat fudinde wor po tagalde hinhin.

Yenbe kamtinde mat huward huward mata goyen yen wa min uryin. Yenbe megen nin doyan mar karkuwan gote doyan al.

Yen bebenbe nen gayen bubulkuɓne wor po yen nurd dunenbe darim wok irde kaminde mat mata bulun bana mat dad sinɓa diryin.

⁶ Irde Nanin Al Kurunyen yufukde derde yen doloɓ ird ird mata doyan mar diryin.

Ningeb denɓ turɓun yanɓa tareɓyabe huginɓ huginɓ Yesu hitte po hiyen. Fudinde wor po.

⁷ Ga nurnan, yenbe kigarinɓin faykek hende katen hikeb al tumɓan kennayin.

Hakde fakamamin marya megen nin alya bereya tumɓan danin gwaha irtirin yen esen obam tinayin.

Gabe fudinde forok yiyyen! Fudinde wor po.

⁸ Be, Al Kurun taremin kurun wor po, Doyan Al Kurun beben, “Nebe Alfaya Omegaya,^c det kurun gayen min urmirin al, irde det kurun gayen pasi ird ird al,” yen hi. Yenbe bikken hinhin, gayenter hi, irde kame wan wan albe yen gogo po.

Yon beben Yesu Kristu kinyin

⁹ Be, ne Yonbe denɓa tumɓan Yesuya heben dadatin yara himirin hime. Irde yen ge ten kanduk tumɓande yenen hite. Neyɓa denɓyabe Al Kurun beben alya bereyamin doyan yird yird bana gon tumɓan hite. Irde yen ge ten kanduk bana hite gega, goke mukku ma ten goya goya sanin heɓ heɓ ge pinɓ ma heɓ hite. Be, ne beben Al Kurunyen mereya Yesu beben tagalde hinhin mereya kurun goyen tagalde himeke al beben goke igin ma nurdeb nade Patmos motmotde gago neramin. ¹⁰ Be, Doyan Al Kurunyen naɓa nalu kurare kurab Holi Spirit beben sanin po ketal nuryin. Irkeb harhokne beben mat al melak kura bigul mere yara kurun po forok yeke nurmirin. ¹¹ Mereminbe gahade: “Mata kenen ha gayen asande kaya. Irdeb asan go Yesuyen alya bereya sios taun 7 bana han goke ten kerke kuyen. Taun 7 gobe Efesus, Sumena, Pergamum, Taiataira, Sardis, Filadelfiayabe Laodisia,” inyin.

¹² Be, al mere nira go kene yenbe tigiri timirin. Tigiri tenbe hulsi go hende yerde yusun yurde hanɓen kutum 7 gol hora beben po yirtin goyen yinmirin. ¹³ Irdeb hulsi 7 go kahaltebe al kura “Al Urmɓ” inen hanɓen goyen kinmirin. Yenbe amil sobam kerke kurkun kahan patare po hitin, irde gol beben po kan yara irtin goyen dumunde bili irtin minyan.

^c 1:8 Alfabe Grik mere kan kan matare mere bilin mehenɓe, munan Omegabe funande. Alfa gote minbe min urd urd nin yitin, munan Omegabe pasi ird ird nin yitin.

¹⁴Tonanya tonan yuwaljenya gobe sipsip wuyjenya gagapya faykek wor po go gwahade hinhin, irde dilingbe kak melak yara agat urde hinhin.

¹⁵Irde kahanbe ain kura baras inen hanjen goyen kakde kunga tike buk yen hel yen hanjen go gwahade yara hinhin. Irde merembe hamula kurunde mat fe solok yen migirin kurun po ten hitin yara nurmirin.

¹⁶Hanin yase belebe dinambe 7 yanarde hinhin. Irde fulejare nin bidila kura misin kurhan kurhan goyenbe mohon bana mat wan hinhin. Irde kimibe nana tarej po timiytin yara hinhin.

¹⁷Be, go kenebe kafura wor po hen al kamtin yara hen kahan minde katen dokolhon yugulun timirin. Irkeb yen bele hanin yase ne hende kerde gaha ninyin: “Kafura ma hawayin. Nebe det kurun gayen min urmirin al, irde det kurun gayen pasi ird ird al. ¹⁸Nebe gwahader hitin al. Kammirin gega, sopte huwarde gwahader po delne gergen himyen gago nenha. Nebe kamde kamde mataya kamtin marte gasunya doyan yird yird tarene yan. ¹⁹Ningeb ge bele mata gayenter forok yen han, irde kame forok yenayin kurun goyen delger yenen ha gayen asande kayayin. ²⁰Hanne yase bana dinambe 7 han gaya hulsi 7 gol bele po yirtin gote min banare hitin gobe gahade: dinambe 7 gobe Yesuyen alya bereya sios taun 7 bana han gote Al Kurunyen miyon 7 nin yitin. Irde hulsi 7 gobe Yesuyen alya bereya sios taun 7 bana han goke yitin,” ninyin.

Efesus nin Yesuyen alya bereya nin yirin

2 ¹Be, al gore sopte gaha ninyin: “Gebe Yesuyen alya bereya sios Efesus taunde han mar goyen doyan yirde merene basan hen saba yirde hiyen al go hitte mere gahade kayayin:

Mere gabe al dinambe 7 hanin yase bele yanarde hulsi go hende yerde yusun yurde hanjen kutum 7 gol bele po yirtin goyen kahalte kun wan ten hiyen al gore gaha yirin:

²Nebe den bele mata igin ten meten sanin po ten hanjen, irde kanduk yenen hanjen goke mukku ma ten sanin po hen hanjen goyen nurde himyen. Irde al kura dufay bulun minyan mar goya hitek ma nurde hanjen go wor nurde himyen. Irde al kura yingen ge yen, ‘Nenbe Yesuyen mere basan mar,’ yen al hoyan usi yirde hanjen mar goyen tunan yurde mereminbe usi goyen kenkela bebek ten hanjen go wor nurde himyen. ³Denbe ne nin ten kanduk kurayen kurayen yenen hanjen gega, goke mukku ma ten tarej po hen hanjen. Kanduk goke yul ma yen hanjen.

⁴Goyenpoga matatin kura goke igin ma nurde hime gobe gahade: denbe han kapya Al Kurunya al hoyanya nin amanen wor po nurd yunen hinhan gega, gayenterbe go mata gob tubul ten gwaha ma ten han.

⁵Denbe mata igin wor po ten hinhande mat katamin gobe uguu wor po

katamiñ geb, goke dufay henayiñ. Irde mata bulunñiñ yubul tenbe yeñ ge bitin mulgañ hekeb hañkapyata mata igiñ ten hinhan goyen sopte ten hinayiñ. Munan gwaha ma tinayiñbe ne beleñ deñ hitte kuñbe nere hulsi deñ bana hi goyen gasuñeñde mat ten siña irmeke gabutin gobe hubu po hiyyeñ. ⁶Gega mata igiñ kura ten hanñen goke amanñen nurde hime gobe gahade: Nikolasyen usi mere gama irde hanñen mar gore mata ten hanñen goke ne beleñ igiñ ma wor po nurde himyen gwahade goyen po, deñ wor go mar goke igiñ ma nurde yunen hanñen. Gobe igiñ wor po ten hanñen.

⁷Ningeb al kirmin minyan marbe Holi Spirit beleñ sios momon yirde hi goyen nurde bebak tinañ ko. Al kura mata bulunya kandukya goyen fole yirnayiñ marbe ne beleñ ok yinneke nene hugiñen hitek he igiñen Al Kurunyen gasunde han goyen igiñ nenayiñ,” yiriñ.

Sumena niñ Yesuyen alya bereya sios niñ yiriñ

⁸Be, al gore sopte gaha ninyiñ: “Gebe Yesuyen alya bereya sios Sumena taunde han mar goyen doyan yirde merene basan heñ saba yirde hiyen al hitte mere gahade kayayiñ:

Mere direñ tihim gabe det kurun gayen min uryiñ irde kame det kurun gayen pasi iryeñ al gote mere. Yenbe kamiñ gega, sopte huwariñ. Meremiñbe gahade: ⁹Nebe deñ beleñ kanduk yeneñ hanñen irde dettin minmon geb det niñ amu wor po heñ hanñen gobe nurde himyen. Gega Al Kurunyen gasunde niñ detbe budam wor po deñ hitte han! Nebe al kura yingey ge yeñ, ‘Neñbe Yuda mar,’ yeñ al usi yirde han mar gore mere bulun mat dirde hanñen gobe nurde himyen. Go mar gobe Yuda mar wor po mon, irde Satanyen mere gama irniñ yeñ gabu irde hanñen mar yeñ yeneñ himyen. ¹⁰Ningeb denbe kanduk yennayiñ goke kafura ma henayiñ. Ga nurnan. Satan beleñ deñ goyen, “Gwaha yirmeke Al Kurun niñ dufaymin tareñ irtiñ goyen tubul tinañ,” yeñ deñ han bana gon niñ al kura yade koyare yiryen. Irde deñ goyen bulun bulun dirke nana fay ¹⁰ gayen kanduk bana hinayiñ. Gega ne niñ dufaytin sanñ irtiñ gobe sanñ po tanarnayiñ. Mudunke kamnayiñ goke bada ma henayiñ. Gwaha tinayiñbe kame gote murungem igiñ wor po Al Kurunya hugiñen heñ heñ goyen duneñ.

¹¹Ningeb al kirmin minyan marbe Holi Spirit beleñ sios momon yirde hi goyen nurde bebak tinañ ko. Al kura mata bulunya kandukya goyen fole yirnayiñ marbe kamnayiñ gega, sopte kamde kamde gasun kak alare ma kuñbe Al Kurunya hugiñ hinayiñ,” yiriñ.

Pergamum niñ Yesuyen alya bereya sios niñ yiriñ

¹²Be, al gore sopte gaha ninyiñ: “Gebe Yesuyen alya bereya sios Pergamum taunde han mar goyen doyan yirde merene basan heñ saba yirde hiyen al hitte mere gahade kayayiñ:

Mere direŋ tihim gabe fulenŋare niŋ bidila kura misiŋ kurhan kurhan goyen minyaŋ al gote mere. Meremiŋbe gahade: ¹³Nebe deŋ goyen Satan beleŋ nigen tiyuŋ wor po yeŋ nurde tareŋ po meten teŋ hiyende gor haŋ gobe nurde himyen. Gega deŋbe kanduk go bana haŋ goke kafura ma heŋ ne po gama nirde haŋ. Deŋbe ne niŋ dufaytiŋ tareŋ irtiŋ goyen tubul ma teŋ haŋ. Irde ne niŋ biŋde mat fudinde wor po tagalde hiyen al Antipas goyen al beleŋ tauntiŋ bana goŋ mayke kamyiŋ goyenter wor deŋbe ne niŋ dufaytiŋ saŋiŋ irtiŋ goyen tubul ma tiyamiŋ. Fudinde, tauntiŋ bana goŋbe Satan beleŋ heŋ meten teŋ hi.

¹⁴Goyenpoga matatiŋ kura igiŋ ma nurde himyen goyen momoŋ direŋ tihim gobe gahade: deŋ haŋ bana goŋ niŋ al kurabe Balamyen saba gama irde haŋ. Balambe Moap naŋare niŋ doyaŋ al kurun Balak beleŋ daha mat Israel mar usi yirke det toneŋ al beleŋ yirtiŋ goyen galak yirtiŋ biŋge nenayiŋ irde leplep matare katnayiŋ yeŋ goke saba iryiŋ. ¹⁵Gwahade goyen po, kuratiŋ kurabe Nikolasyen usi saba gama irde haŋ. ¹⁶Niŋgeb matatiŋ goyen yubul teŋ Al Kurun niŋ bitiŋ mulgaŋ hiyyeŋ. Moŋgo ne beleŋ deŋ hitte araŋeŋ kuŋ fulenŋare niŋ bidila mohonŋer hiyen goyen teŋ go mar goya artek geb.

¹⁷Niŋgeb al kirmiŋ minyaŋ marbe Holi Spirit beleŋ sios momoŋ yirde hi goyen nurde bebaŋ tinaŋ ko. Al kura mata bulunya kandukya goyen fole yirnayiŋ marbe kame ‘mana’^d banare hitiŋ goyen kura yuneŋ. Irde hora faykek go hende al deŋe gergeŋ katiŋ goyen wor yuneŋ. Al deŋe gobe hora goyen tiyyeŋ al go po ga nuryeŋ,” yiriŋ.

Taiaaira niŋ Yesuyen alya bereya sios niŋ yiriŋ

¹⁸Be, al gore sopte gaha ninyiŋ: “Gebe Yesuyen alya bereya sios Taiaaira taunde haŋ mar goyen doyaŋ yirde merene basaŋ heŋ saba yirde hiyen al hitte mere gahade kayayiŋ:

Mere direŋ tihim gabe Al Kurunyen Urmiŋde mere. Diliŋbe kak melak yara agat urde hinhin. Irde kahaŋbe ain kura baras ineŋ haŋyen goyen kakde kumba tike buk yeŋ haŋyen go gwahade yara hinhin. Meremiŋbe gahade: ¹⁹Nebe mata dahade teŋ haŋyen goyen nurde hime. Irde deŋ beleŋ Al Kurunya al hoyanya niŋ amaŋeŋ nurd yuneŋ haŋyen irde Al Kurun niŋ dufaytiŋ saŋiŋ irde yeŋ ge meten

^d 2:17 Mana gobe bikkeŋ Israel mar Isip naŋa tubul teŋ sawsawa po kurun naŋa bana kuŋ hikeya Al Kurun beleŋ biŋge yuneŋ hinhin go goyen. Mana kurabe kuwe bana heŋ Biŋa Bokis bana hinhin gega, Babilon mar beleŋ Israel marte naŋa waŋ yakira tikeya bokis gobe bana kuriŋ. Gega Israel marbe kame Mesaia wayyeŋ nalurebe Bokis gobe kawan forok yiyyeŋ yeŋ nurde haŋyen.

tenj hanjen goyen nurde hime. Denbe yenj ge tenj kanduk yenenj hanj gega, goke mukku ma tenj tarenj po henj hanjen goyen wor nurde hime. Gayenter denj belej mata iginj tenj hanjen gobe hanj kanya tinenj henja mata tenj hinhan gote folek wor po tenj hanjen goyen mananj nurde hime.

²⁰Goyenpoga matatinj kura goke iginj ma nurde himyen. Matatinj gobe gahade: denbe bere kura goyen denja henj bikkenj Yesebel^e mata tenj hinhin goyen gama irde hiyen gega, goke bulunjen ma nurde tubul tike denja hi. Bere gobe yingenj ge yenj, 'Nebe Al Kurunjen mere basanj bere,' yenj hi. Bere gore meten marne usi saba yirde mata bulunjen tenj tenj beljenje yukukeb al kurabe leplep mata tenj hanj, irde kurabe det tonej al belej yirtin goyen galak yirtin binje nene hanj. ²¹Nebe bere goyen Al Kurunjen ninj binj mulganj henj mata bulunjinj yubul tenj tenj nalu kerd unminj gega, gwaha titek ma nurde hi. ²²Ningeb bere goyen temeymeke kanduk kurunjen bana katyenj. Irde al berem yanj belej bere goya duwan tenj tenj mata tenj hanjen marbe ulinje kanduk kurunjen forok ird yunenj. Go mar gobe bere gote mata bulunjen gama irtin goyen yubul ma tinayinje kanduk kurunjen forok irde yunenj. ²³Nebe al kura bere gote saba po gama irde dirnenj wenj hitin mar goyen gasa yirmeke kamnayinjen. Gwaha yirmeke gab Yesuyen alya bereya tumnanjen alyen binje ninj dufay kenkela nurde hi albe yenj po yenj bebak tinayinjen. Nebe denj belej mata tenj hanj kurunjen gote murungem dunenjen.

²⁴Be, denj Taiataira taunde ninj sios bana bere gote saba ma gama irde Satanyen mata kura banare ninj wor po inenjen hanjen gote saba ma nurde hanjen mar goyen momonjen direnjen tihim. Mere ga direnjen tihim gabe kanduk hoyanjen kura dune yenj ma dinenjen hime. Merenebe gahade: ²⁵Denbe saba iginjen titinjen goyen tarenjen po tanarde hinayinjen. Irkeb ne wanjen denejen.

²⁶Ningeb al kura mata bulunjen kandukya goyen fole irde dufayne po gama irde hike kunjen kunjen nalu funanjen forok yiyyenjen marbe nanja karkuwanjen kurayen kurayen goyen doyanjen yird yird sanjen yunenjen.

²⁷Goke tenje Al Kurunjen asanjen gahade katinjen hi:

'Yenbe doyanjen al kurunjen kutum kura ain belejen po irtin goyen tanarde mel go doyanjen yirde hiyenjen.

Yenjen belejen mel go gwamunjen yurke kuwe yase galanjen yitinjen yara henjen bulunjen wor po henayinjen,' yitinjen. *Tikinjen 2:9*

Ningeb yitinjen gwahade goyen po Adone belejen alya bereya doyanjen yird yird sanjen nuntinjen geb, ne wor mata bulunjen kandukya goyen

^e **2:20** Yesebelbe bikkenjen Israel marte doyanjen al kura Ahapyen berem. Bere gobe ungunja dolojen yirdeb Israel mar mananjen usi yirke bere gote mere gama irde ungunja dolojen yirde hinhan. (1 Doyanjen Mar 16:31; 18:4; 21:1-26; 2 Doyanjen Mar 9:22; 9:30-37)

fole yirde dufayne po gama irde hinayiŋ mar goyen doyaŋ mar karkuwaŋ heŋ heŋ tareŋ yuneŋ. ²⁸Irde tareŋne turuŋ yaŋ wor po bayfoŋ yara goyen wor yuneŋ. ²⁹Al kirmiŋ miŋyaŋ marbe Holi Spirit beleŋ sios momoŋ yirde hi goyen nurde bebak tinaŋ ko,” yiriŋ.

Sardis niŋ Yesuyen alya bereya sios niŋ yiriŋ

3 ¹Be, al gore sopte gaha ninyiŋ: “Gebe Yesuyen alya bereya Sardis taunde haŋ mar goyen doyaŋ yirde merene basaŋ heŋ saba yirde hiyen al hitte mere gahade kayayiŋ:

Mere direŋ tihim gabe Holi Spirit mata wukkeŋ wor po 7 miŋyaŋ goya dinambe 7 goya yanarde hi al gote mere. Meremiŋbe gahade: nebe mata dahade teŋ haŋyen gobe nurde hime. Al hoyaŋ beleŋbe igiŋ po haŋ yeŋ deney haŋ gega, delnerbe al kamtiŋ yeŋ deney hime. ²Ningeb huwarnan! Irde matatiŋ igiŋ yubul titek heŋ haŋ goyen sopte yanarde saŋiŋ po yirnayiŋ. Gobe Al Kuruŋ diliŋde matatiŋ gobe hako po haŋ yeŋ deney hime geb, gago dineŋ hime. ³Ningeb haŋkapy saba damiŋ dirke nuramiŋ goke bitiŋ sir ma yenayiŋ. Irde saba goyen gama irde mata buluŋtiŋ goyen yubul teŋ Al Kuruŋ niŋ bitiŋ mulgaŋ hiyyeŋ. Munan huwarnayiŋ moŋbe ma nurde hikeya kawo mar waŋ haŋyen gwahade po, deŋ hitte kuŋ matatiŋ gote muruŋgem buluŋ duneŋ. Deŋbe ne gayen deŋ hitte kuŋ kuŋ nalu goyen epte ma bebak tinayiŋ. ⁴Goyenpoga deŋ sios Sardis taunde haŋ mar bana goŋ niŋ al kura matamiŋbe uliŋ umŋa tikiŋ ma yirtiŋ yara Al Kuruŋ diliŋde wukkeŋ haŋ. Mel gobe Al Kuruŋ diliŋde wukkeŋ hitiŋ mar gote amil faykek wor po goyen yunmeke hor teŋbe neya heŋ mata huwak teŋ hinayiŋ. Mel gobe gwaha yirtek po haŋ geb, gogo yireŋ. ⁵Ningeb al kura mata buluŋya kandukya goyen fole yirnayiŋ marbe mel go yireŋ gwahade goyen po, amil faykek wor po goyen hor yirde yuneŋ. Irde deŋembe Al Kurunya hugineŋ hitek marte deŋem katiŋ asaŋde mat yade siŋa ma yireŋ. Gwaha titteŋbe Adoneya miyoŋmiŋyat diliŋ mar mel goyen nere yeŋ nurd yuneŋ. ⁶Al kirmiŋ miŋyaŋ marbe Holi Spirit beleŋ sios momoŋ yirde hi goyen nurde bebak tinaŋ ko,” yiriŋ.

Filadelfia niŋ Yesuyen alya bereya sios niŋ yiriŋ

⁷Be, al gore sopte gaha ninyiŋ: “Gebe Yesuyen alya bereya sios Filadelfia taunde haŋ mar goyen doyaŋ yirde merene basaŋ heŋ saba yirde hiyen al hitte mere gahade kayayiŋ:

Mere direŋ tihim gabe wukkek wor po, irde mere fudinde po teŋ hi al gote mere. Yeŋbe Al Kuruŋ beleŋ alya bereyamiŋ doyaŋ yird yird gasuŋ Dewityen taun ineŋ haŋyen gote miŋ al geb, taun yame degel degel ki goyen miŋyaŋ. Yeŋ beleŋ yame goyen hol iryeŋbe al

kura beleŋ epte ma tayyen. Irde yeŋ beleŋ yame goyen tayyenbe al kura beleŋ epte ma digilyeŋ. Meremiŋbe gahade: ⁸Nebe deŋ beleŋ mata dahade teŋ haŋ goyen nurde hime. Deŋ goyen igiŋ Dewityen taun bana hurkunayiŋ yeŋbe yame degelde dunmiŋ ga hi ga kennan. Ne beleŋ yame degelde dunmiŋ gabe al kura epte ma tayyen. Deŋbe saŋiŋtiŋ kurun moŋ gega, merene po gama irde ne niŋ helwan ma heŋ haŋyen goyen nurde hime. ⁹Ga nurnan! Al buda Satanyen mere gama irde haŋ mar gobe usi mar wor po. Go mar gobe yiŋgeŋ ge yeŋ, ‘Neŋbe Yuda mar,’ yeŋ haŋ gega gwahade moŋ. Nebe go mar goyen bul yirmeke deŋ hitte wan kahaŋtiŋ miŋde urgun kanayiŋ. Irdeb ne beleŋ bubulkunne wor po yeŋ nurd duneŋ himyen goyen keneŋ bebak tinayiŋ. ¹⁰Deŋbe kanduk yeneŋ mukku ma teŋ tareŋ heŋ heŋ ge piŋeŋ ma heŋ hinayiŋ yeŋ tareŋ po dinmiriŋ goyen po gama irde haŋyen geb, ne wor kanduk kurun forok yeŋ yeŋ nalure kanduk gore bulun dird dird beŋeŋbe pet tiyeŋ. Kanduk gobe alya bereya megen haŋ kurun gote dufaymiŋya matamiŋya tunan yurd yurd niŋ forok yiyyeŋ gega, deŋ goyen kanduk go bana mat dad siŋa direŋ.

¹¹Nebe heŋ ga ma wayeŋ. Niŋgeb mere fudindeya mata huwakya deŋ hitte hi goyen keŋkela po tanarde hinayiŋ. Gogab kame matatiŋ igiŋ gote muruŋgem goyen al hoyan beleŋ epte ma goran dirnayiŋ. ¹²Niŋgeb al kura mata bulunya kandukya goyen fole yirnayiŋ marbe Al Kurunyen ya balem gote tolaminiŋ yireŋ geb, Al Kurunya hugineŋ hinayiŋ. Yeŋbe ya balem go ma po tubul teŋ siŋare kunayiŋ. Nebe Al Kurunyen deŋemya taunmiŋ gote deŋemya goyen mel go ulinde kayeŋ. Irde deŋne wor kayeŋ. Taun gobe Yerusalem gergeŋ, Al Kurunyen gasunde mat katyeŋ. ¹³Al kirminiŋ miŋyan marbe Holi Spirit beleŋ sios momoŋ yirde hi goyen nurde bebak tinaŋ ko,” yiriŋ.

Laodisia niŋ Yesuyen alya bereya sios niŋ yiriŋ

¹⁴Be, al gore sopte gaha ninyiŋ: “Gebe Yesuyen alya bereya sios Laodisia taunde haŋ mar goyen doyan yirde merene basan heŋ saba yirde hiyen al hitte asan gahade kayayiŋ:

Mere direŋ tihim gabe mere fudinde gote miŋ alyen mere. Yeŋbe biŋa tiyyiŋ goyen fudinde po gama ird ird al, irde Al Kurun niŋ fudinde po tagal tagal al. Al gobe det kurun gayen Al Kurun beleŋ forok yiriŋ gote doyan al. Meremiŋbe gahade: ¹⁵Nebe deŋ beleŋ mata dahade teŋ haŋyen goyen nurde hime. Dende Al Kurun gama ird ird matatiŋbe saŋiŋ wor po moŋ, irde bulun wor po moŋ, kahaltem po haŋ. Gobe fe kura uka wor po moŋ, irde uysun wor po moŋ go gwahade goyen. Goyenbe deŋ goyen uka hiniŋ yeŋbe ukam po hiwoŋ, munaŋ uysun hiniŋ yeŋbe uysun po hiwoŋ yeŋ nurde hime. ¹⁶Deŋbe fe kura uka wor po moŋ, irde uysun wor

po moŋ yara geb, mohoŋner mat meyaŋ titiŋ yara dirde demeyde harhokne duneŋ tihim. ¹⁷Deŋbe dindigeŋ ge yeŋbe, ‘Neŋbe igiŋ wor po hite. Mataniniŋbe igiŋ po teŋ hityen geb, mata igiŋ hoyan kura neŋ titekbe hubu,’ yeŋ hanŋyen. Goyenpoga deŋbe al bunineŋ wor po, mata igiŋ kura deŋ hitte ma hi goyen bebak ma teŋ haŋ! Deŋbe kaŋaŋ mar, kupsoŋ heŋ kuŋ haŋ, irde diltiŋ titmiŋ yeŋ deneŋ hime. ¹⁸Niŋgeb ne hitte mat gol hora^f kakde kumga tike igiŋ wor po hitiŋ goyen damu tinaŋ dineŋ hime. Gogab Al Kurunŋ diliŋde samuŋtiŋ yaŋ mar wor po henayiŋ. Irde amil faykek^g ne hitte damu tinaŋ dineŋ hime. Gogab kupsoŋ heŋ memyak hitiŋ haŋ goyen amil gore ulitiŋ aw duryeŋ. Irde diltiŋ titmiŋ go sope yird yird goke he fimiŋ kura ne hitte damu tinaŋ dineŋ hime. Gogab igiŋ naŋkennayiŋ.

¹⁹Nebe al kura bubulkuŋne wor po yeŋ nurde yuneŋ himyen marbe buluŋ tike goke yineŋ teŋ saba yirde himyen. Niŋgeb mata igiŋ gama yird yird mata goke po nurde hinayiŋ. Irde mata buluŋtiŋ yubul teŋ yeŋ ge bitiŋ mulgaŋ hiyyeŋ. ²⁰Ga nurnaŋ! Nebe yamere huwarde yame mayde hime. Al kura merene nurde yame degelde nunkeb bana goŋ hurkuŋbe yeŋya dula teŋ yeŋya hireŋ.

²¹Niŋgeb al kura mata buluŋya kandukya goyen fole yirnayiŋ marbe ne beleŋ al buluŋ fole irde deŋne yaŋ wor po heŋ Adoneya har gwahade goyen po, yeŋ wor doyaŋ mar karkuwaŋ heŋ neya heŋ heŋ saŋiŋ goyen yuneŋ. ²²Al kirmiŋ miŋyaŋ marbe Holi Spirit beleŋ sios mere momoŋ yirde hi goyen nurde bebak tinaŋ ko,” yiriŋ.

Al Kurunŋyen gasuŋde niŋ taun goke yiriŋ

4 ¹Be, al gore gwaha yiriŋ go kamereb Al Kurunŋyen gasuŋde hurkuŋ hurkuŋ yame figiltiŋ hinhin goyen forok yeke kinmiriŋ. Irkeb al melak kura haŋkapyia bigul mere titiŋ yara nurmiriŋ goyen gore po, “Hende gar waya. Irkeb kame mata dahade forok yenayiŋ goyen gikala gireŋ,” ninyiŋ. ²Irkeb goya goyen po Holi Spirit beleŋ tareŋ po ketal nuryiŋ. Irkeb kemne mat Al Kurunŋyen gasuŋ bana Doyaŋ Al Kurunŋyen keperd keperd gasuŋde al kura keperde hike kinmiriŋ. ³Doyaŋ Al Kurunŋyen keperd keperd gasuŋde gor keperde hinhin al gote dinsokbe yaspa horaya hora bukkeŋ konilian ineŋ hanŋyen go gwahade yara agat urde hinhin. Irde gamatsaw beleŋ keperd keperd gasuŋ go milgu irtiŋ goyen kinmiriŋ. Gamatsaw gobe hora digulak emeral ineŋ hanŋyen gwahade yara melak heŋ hinhin. ⁴Be, Doyaŋ Al Kurunŋyen keperd keperd gasuŋ go siŋakyaŋbe doyaŋ marte keperd keperd gasuŋ 24 gore milgu irtiŋ hinhan. Go hereŋbe Al Kurunŋyen alya bereyat doyaŋ mar parguwak

^f **3:18** Al Kurunŋ diliŋde mata igiŋ wor po goke yitiŋ. ^g **3:18** Amil faykekbe mata huwak wukkeŋ wor po goke yitiŋ.

24 beley kipirtinje hinhan. Mel gobe amil faykenj hor yirde tonanbebe doyan alyen tonanhor yirtin hinhan. ⁵Be, Doyan Al Kurunyen keperd keperd gasunje matbe dagamel ten daga katenj hururun ten hinhin. Keperd keperd gasun goyen diliŋ marbe hulsi 7 beley melak henj toltol yen hinhan. Hulsi 7 gobe Holi Spirit mata wukkenj wor po 7 minyan go goyen. ⁶Irde makaŋ ala galas beley po irtin yara wukkenj wor po goyen wor keperd keperd gasun go diliŋ mar beley hinhin.

Be, doyan mar 24 gote keperd keperd gasun Doyan Al Kurunyen keperd keperd gasun milgu irtin goyen kahal banabe det binfut minyan Al Kurun beley yirtin kura sipte hinhan. Det gote binja harhokya beleybe diliŋ beley po sam yirtin hinhan. ⁷Det binfut minyan goyen kurabe laion yara kinmirin. Kurabe bulmakaw yara, irde kurate kiminbe al kinin yara kinmirin. Irde funanbe buntulun nana kota foy titin yara gor hike kinmirin. ⁸Det binfut minyan sipte goyen yunkurenj yunkurenbe tapen 6 minyan hinhan. Irde ulin piginbe diliŋ beley po tumnan sam yirtin hinhan. Tapen yufuk bana manan diliŋ beley sam yirtin hinhan. Det binfut minyan gobe nankehalya wawunya huginenj gaha yen hinhan:

“Al wukkenj, al wukkenj,

Doyan Al Kurunbe al wukkenj wor po.

Al Kurun tarenminj kurun wor po gobe

bikken hinhin, gayenter hi,

irde kame wayen,” yen hinhan.

⁹Det binfut minyan gore Doyan Al Kurunyen keperd keperd gasunje keperde henj gwahader hitin al goyen denem turun yan irde isoka irde metenminj goke igin nurd unen hinhan. ¹⁰Gwaha ten hike goya goyenbe Al Kurunyen alya bereyat doyan mar parguwak 24 beleybe Doyan Al Kurunyen gasunje keperde hinhin al gote diliŋ mar urgun kan gwahader hitin al goyen doloŋ irde hinhan. Mel gobe doyan mar karkuwanje tonanhorminj goyen yugu ten Doyan Al Kurunyen keperd keperd gasun goyen kahan minde yerdeb gaha yen hinhan:

¹¹“Gebe Doyan Al Kurunninin, irde Al Kurunninin.

Ge beley po ga det kurun gayen yirarin.

Dufaye po gama irde det kurun gayen forok yirarin.

Ningeb den turun yanja sanjin kurunya tetek po ha.

Irde palap girtek po ha,” yen hinhan.

Asanya Sipsip al dirin dirinya

5 ¹Be, go kamereb Doyan Al Kurunyen keperd keperd gasunje kipirtin hinhin al gote haniŋ yase banabe asan sobam bili irtin kura goyen tanarde hike kinmirin. Asan gobe harhok beleya bin beleya tumnan katin, irde det unguni yara goyen 7 yade asan bili irtin gor sanjin yirtin hinhan. ²Be, nebe Al Kurunyen miyon tarenminj kurun wor

po kura gore hokde, “Ganuŋ al beleŋ det unguni yara asaŋ yulyaŋeŋ bili irtinŋe taga yurtinŋ goyen epte yukala teŋ asaŋ go digilyeŋ?” yeke kinmiriŋ. ³Goyenpoga al gore kura asaŋ ulyaŋ go epte degelteŋ moŋ. Asaŋ goyen bana keneŋ keneŋ manaŋ epte moŋ. Al Kurunyen gasunŋe niŋ, megen niŋ, megen biŋ bana niŋ al ma det kura beleŋ epte ma asaŋ go degelde kenteŋ hinhan. ⁴Irkeŋ al wukkeŋ wor po kura gore asaŋ goyen epte degelde go biŋde kenteŋ miŋmoŋ wor po keneŋbe goke esiŋde hinhan. ⁵Irkeŋ Al Kurunyen alya bereyat doyaŋ marte parguwak kura beleŋ, “Eseŋ ma yo! Yekop urmiŋ kura Yuda, deŋem kurabe Laion ineŋ haŋyen gote dari gama irde forok yiriŋ al gobe Dewityen miŋde mat watiŋ. Yeŋbe asogom al buluŋ goyen fole irtiŋ. Al gore gab det unguni yara beleŋ asaŋ sobam bili irde tareŋ yirtiŋ det 7 goyen epte yukala teŋ digilyeŋ,” ninyiŋ.

⁶Be, go kamereŋ al kura Sipsip al diriŋ diriŋeŋ go gwahade yara kinmiriŋ. Sipsip go keneŋmiŋbe bikkeŋ mayke kamtiŋ yara kinmiriŋ. Be, Sipsip diriŋeŋ go Doyaŋ Al Kurunyen keperd keperd gasuŋ kahalte wor po gor huwarde hinhin. Keperd keperd gasuŋ goyen siŋakyaŋbe det biŋfut miŋyaŋ sipteŋ Al Kurunyen alya bereyat doyaŋ marte parguwakya beleŋ milgu irtiŋ hinhan. Sipsip diriŋeŋ gote hirkambe 7, irde diliŋ wor 7 hinhan. Diliŋ 7 gobe Holi Spirityen mata wukkeŋ wor po 7 miŋyaŋ go goyen. Holi Spirit gobe Al Kurun beleŋ alya bereŋ megen haŋ kurun goke teŋ kerke kuriŋ. ⁷Be, Sipsip diriŋeŋ gore Doyaŋ Al Kurunyen keperd keperd gasunŋe hinhin al go hitte kuŋ haniŋ yase bana asaŋ ulyaŋ bili irde unguni po saŋiŋ irtiŋ hinhin goyen tiriŋ. ⁸Be, yeŋ beleŋ asaŋ go tekeŋ det biŋfut miŋyaŋ sipte goŋ Al Kurunyen alya bereyat doyaŋ marte parguwak 24 gore Sipsip diriŋeŋ kimiŋ mat urgunŋ kayamiŋ. Urgunŋ kayamiŋ mar gobe yuŋkureŋ yuŋkureŋ tikiŋde niŋ det hap ineŋ haŋyen goyen nende gigen yanartiŋ hinhan. Irde koroŋ gol hora beleŋ po yirtiŋ goyen wor yanartiŋ hinhan. Koroŋ bana goŋbe det hamiŋ igiŋ muŋ wor po go goyen miŋyaŋ hinhan. Det hamiŋ igiŋ muŋ wor po gobe Al Kurunyen alya bereŋ beleŋ Al Kurun mere irde haŋyen go goyen. ⁹Be, mel gobe tikiŋde niŋ det hap ineŋ haŋyen goŋ koroŋ gol hora beleŋ yirtiŋ goyen yanarde tikiŋ gergeŋ kura hamiŋ. Tikiŋmiŋbe gahade:

“Gebe mugunke kamariŋ.

Irde dariŋe wok yitiŋ go hende harde alya bereŋ Al Kurun hitte yumulgaŋ tiyariŋ.

Alya bereŋ gobe miŋ kurayen kurayen, meremiŋ kurayen kurayen, dari miŋ kurayen kurayen, naŋa kurar niŋ kura niŋ yumulgaŋ tiyariŋ.

Goke teŋbe ge beleŋ po gab epte asaŋ goyen teŋ degelayiŋ.

¹⁰Ge beleŋ mel goyen alya bereŋ Al Kurun beleŋ doyaŋ yird yird mar yirariŋ.

Irde Al Kurunɗu doloŋ ird ird mata doyaŋ mar yirariŋ.
Irkeb yeŋ beleŋ det kurunɗu megen haŋ kurunɗu goyen doyaŋ yirde
hinayiŋ,” yamiŋ.

¹¹Be, go kamereb nebe Al Kurunɗu miyoŋ budam wor po epte ma
kapyan hetek goyen yenengbe meremiŋ mananɗu nurmiriŋ. Miyoŋ goreb
Doyaŋ Al Kurunɗu keperd keperd gasuŋ, det biŋfut miŋyaŋ sipte goyen,
irde Al Kurunɗu alya bereyat doyaŋ marte parguwak goyen milgu
yiramiŋ. ¹²Irdeb hokde po tikiŋ gahade hamiŋ:

“Sipsip dirŋeŋ mayke kamiŋu gore po gab epte saŋiŋ tetek hi.
Irde epte Al Kurunɗu samuŋ tumɗaŋ igiŋ yawartek hi.
Dufay wukke, saŋiŋ, deŋe turɗuŋ yaŋ goyen igiŋ yende hetek hi.
Irde palap irde isoka irtek albe ge po,” yamiŋ.

¹³Be, go kamereb det kurunɗu gayen tumɗaŋ tikiŋ heŋ hinhan. Nanɗiŋde
niŋ, megen niŋ, megen biŋ bana niŋ, irde makaŋde niŋ det kurunɗu goreb
gahade tikiŋ hamiŋ:

“Doyaŋ Al Kurunɗu keperd keperd gasuŋde kipirtiŋ hi al goya
Sipsip dirŋeŋya goyen isoka yirde palap yirde
deŋe turɗuŋ yaŋ yirde tareŋ kurunɗu gobe gwahader yeŋ po yunen
hitek,” yamiŋ.

¹⁴Irkeb det biŋfut miŋyaŋ sipte gore wol heŋbe, “Fudinde wor po,”
yamiŋ. Irkeb Al Kurunɗu alya bereyat doyaŋ marte parguwak beleŋ
dokolhoŋ yuguluŋ teŋ urguŋ kaŋbe Al Kurunɗu Sipsip dirŋeŋya goyen
doloŋ yiramiŋ.

Asaŋ bili irde tareŋ yirtiŋ uŋguni goyen yukala teŋ asaŋ go digiliyiŋ

6 ¹Be, go kamereb Sipsip dirŋeŋ beleŋ asaŋ bili irde uŋguni 7 po
saŋiŋ yirtiŋ goyen uŋkurenɗiŋ ukala tiyiŋ goyen kinmiriŋ. Irkeb
det biŋfut miŋyaŋ sipte hinhan goyen uŋkurenɗu kura beleŋ “Waya!” yiriŋ.
Mere tiyiŋ gobe daga migiriŋ yara tiyiŋ. ²Irkeb hos faykek kura goyen
forok yeke kinmiriŋ. Al kura hos go hende hinhin al gobe hite haniŋde
mananɗu hinhin. Irde doyaŋ alyen tonanɗhor hor irde untiŋ. Irkeb megen
hike kwa kurunɗu goyen bana goŋ kuŋ fulenɗa tiyiŋ. Yeŋ beleŋ po megenya
alya yad yad niŋ teŋ hos hende kuriŋ.

³Be, Sipsip dirŋeŋ beleŋ uŋguni kura sopte ukala tikeb det biŋfut
miŋyaŋ sipte goyen kura beleŋ wor sopte, “Waya!” yeke nurmiriŋ. ⁴Be,
gwaha yekeb hos hoyanɗu kura forok yiriŋ. Hos gobe bukkeŋhel yitiŋ wor
po. Hos go hende keperde hinhin al gobe alya bereya megen haŋ gayen
biŋ kamke awalikde heŋ heŋ mata goyen teŋ siŋa irke al yiŋgeŋ uliŋ
kadam muguneŋ teŋ kamde kamde saŋiŋ untiŋ. Irde fulenɗare niŋ bidila
kurunɗu kura goyen wor untiŋ.

⁵Be, Sipsip dirŋeŋ beleŋ uŋguni tareŋ yirtiŋ 7 bana goyen karwomiŋ
ukala tikeb det biŋfut miŋyaŋ sipte goyen hoyanɗu kura beleŋ wor, “Waya!”

yeke nurmiriŋ. Be, gwaha yekeb hos kura delne mar forok yeke kinmiriŋ. Hos gobe halkeŋ wor po. Hos go hende keperde hinhin al gobe det kanduk tuŋaŋ teŋ teŋ det kura haniŋde tanartiŋ hinhin. ⁶Irkeb det biŋfut miŋyaŋ sipte hinhan bana goŋ mat al melak kura forok yeke nurmiriŋ. Merebe gahade: “Albe meten teŋ hinayiŋ gega, biŋgebe budam ma forok yeŋ hinayiŋ. Irkeb naŋa fay uŋkuren bana meten teŋ muruŋgem teŋ hinayiŋ gote hora gore biŋge damu teŋ hinayiŋ gega, biŋge budam ma yade hinayiŋ. Niŋgeb biŋge damu tiniŋ yeŋ wit damu teŋ hinayiŋbe koron dirneŋ uŋkuren gwahade po teŋ hinayiŋ, munan bali damu teŋ hinayiŋbe koron mukneŋ karwo gwahade po yade hinayiŋ. Goyenbe mel gore olip fimiŋya wain fimiŋyabe iŋiŋ yawarnayiŋ geb, olip heya wain heyabe buluŋ ma yirayiŋ,” yiriŋ.

⁷Be, Sipsip dirneŋ beleŋ unguni tareŋ yirtiŋ 7 bana goyen siptemiŋ ukala tikeb det biŋfut miŋyaŋ sipte hinhan goyen funaŋ beleŋ, “Waya!” yeke nurmiriŋ. ⁸Be, gwaha yekeb hos kura delne mar forok yeke kinmiriŋ. Hos gobe wulsakkeŋ. Hos go hende keperde hinhin al gote deŋembe Kamde Kamde. Yeŋ hos hende waŋ hikeb Al Metebe harhokde go po bindere gama irde waŋ hike kinmiriŋ. Al irawa gobe alya bereya megen haŋ kurun gayen pota yirke buda sipte hekeb buda uŋkurenbe buluŋ yirke kamde kamde saŋiŋ yuntiŋ. Niŋgeb buda uŋkuren goyen bana al kurabe fuleŋare niŋ bidilare kamnayiŋ, biŋge kamde kamnayiŋ, kurabe garbam heŋ kamnayiŋ, irde kurabe dapŋa duwi kafuram wor po gore gasa yirke kamnayiŋ.

⁹Be, Sipsip dirneŋ beleŋ unguni saŋiŋ yirtiŋ 7 bana goŋ siptesoŋoŋmiŋ goyen ukala tiyyiŋ. Irkeb al buda kura Al Kurunyen mere gama irde tagalde kuŋ hike gasa yirke kamamiŋ mar gote toneŋbe Al Kurun galak ird ird alta yufukde hike yinmiriŋ. ¹⁰Mel gore hokde po, “Doyaŋ Al Kurun, tareŋgebe kurun wor po. Gebe wukkeŋ wor po, irde meregebe fudinde wor po. Goyenbe megen haŋ mar beleŋ mudunke kamtiriŋ goyen goke daha naŋa gab merere yerde matamiŋ gote muruŋgem buluŋ goyen wol heŋ yunayiŋ? Sobamde po doyaŋ hetek we?” inamiŋ. ¹¹Irde mel gobe yuŋkuren yuŋkuren amil faykeŋ nende gigen yuntiŋ. Irdeb, “Deŋ mudunke kamamiŋ gwahade goyen po, Doyaŋ Al Kurunya heŋ kadtiŋ yago hitiŋ marya Doyaŋ Al Kurunyen meten mar kadtiŋ hitiŋ goyen wor gasa yirke kamde hinayiŋ goyen kuŋ kuŋ budam heŋ ep heke gab muduntiŋ mar goyen merere huwarnayiŋ geb, goke doyaŋ heŋ hinayiŋ. Go nalu gobe ulyaŋde ma hikeya forok yiyyen,” yinke nuramiŋ.

¹²Be, Sipsip dirneŋ beleŋ unguni tareŋ yirtiŋ 7 bana goyen 6miŋ ukala tiyyiŋ goyen kinmiriŋ. Irkeb niniŋa kurun wor po forok yiriŋ. Naŋabe kidoma buluŋ po hiriŋ. Gobe meme sikkeŋ halkeŋ wor po gore uliŋhor irtiŋ gwahade yara hiriŋ. Irde gagasibe dari yara bukkeŋhel wor po hiriŋ. ¹³Irde dinambe yagobe naŋkiŋde mat suk yeŋ megen katamiŋ.

Dinambe gobe meɲe kurun harde fik he igineɲ haɲkapok fuguru tike megen kateɲ haɲyen go gwahade tiyamin. ¹⁴Naɲkinbe asan sobam bili irtin yara bili irke hubu hiriɲ. Duguya motmotyabe tumɲan gasuɲɲe mat yade hoyande yirtin. ¹⁵Irkeb megen nin doyan mar karkuwan, doyan mar, fuleɲa marte doyan mar karkuwan, al horam yan mar, sanɲin minyan mar, al kurate yufuk bana heɲ muruɲgem moɲ dulin meten ten haɲ maryabe yinɲen dufayminde haɲ marya tumɲan busaharde duguyan hurkun horabok bana hinhan, irde kurabe hora karkuwan kahalte mabok binde hinhan. ¹⁶⁻¹⁷Mel gobe duguya hora karkuwanya goyen mabokde heɲbe, “Doyan Al Kurunyen keperd keperd gasunde keperde hi al goya Sipsip dirɲenya gote bearar goyen ganun mar beleɲ epte sanɲin heɲ fole irnayan? Hubu wor po! Niɲgeb deɲ duguya hora karkuwanya, neɲ hende katnan. Irdeb Doyan Al Kurunyen keperd keperd gasunde keperde hi al gote diliɲde hitek moɲ geb, bana dernan. Irkeb Sipsip dirɲen gote bearar go ma kentek,” yamin.

Alya bereya 144,000 goyen basiɲa yiriyin

7 ¹Be, go kamereb Al Kurunyen miyon sipte beleɲ megen murun kurhan kurhan huwarde hike yinmirin. Miyonmin sipte gobe mongo meɲe huwarde megenya makaɲyabe heya bulun yiryenkek yenbe meɲe beleɲ sipte goyen pet ten hinhan. ²Irke Al Kurunyen miyon hoyan kura nana wan wan beleɲ mat wan hike kinmirin. Yenbe alya bereya Al Kurun gwahader hitin beleɲ basiɲa yiriyin goyen kimiɲde soɲ yird yirdde nin det goyen minyan wake kinmirin. Be, miyon gore miyon sipte, megenya makaɲya bulun yirtek tareɲ yuntin goyen kuware po hoy yirdeb yinyin. ³“Neɲ beleɲ Al Kuruninin gote meten mar kimiɲde soɲ yird yird goyen pasi irteke gab megen, makaɲya heya goyen gwamuɲ yurnayin,” yinyin. ⁴Irde alya bereya Al Kurunyen meten mar kimiɲde soɲ yirtin goyen kapyan heɲ pasi irdeb, “Soɲ yirtin mar tumɲanbe 144,000,” yeke nurmirin. Kimiɲde soɲ yirtin mar gobe Israel mar al min 12 bana mat watin. ⁵Go mar gobe gahade:

Yuda minde ninbe 12,000,

Ruben minde ninbe 12,000,

Gat minde ninbe 12,000,

⁶Aser minde ninbe 12,000,

Naptali minde ninbe 12,000,

Manase minde ninbe 12,000,

⁷Simeon minde ninbe 12,000,

Liwai minde ninbe 12,000,

Isakar minde ninbe 12,000,

⁸Sebulun minde ninbe 12,000,

Yosep minde ninbe 12,000,

Benyamin minde ninbe 12,000.

Al buda kurun beleŋ Al Kurun doloŋ iramiŋ

⁹Be, go kamereb al buda kurun wor po epte ma kapyan hetek goyen delne mar forok yeke yinmiriŋ. Mel gobe naŋa karkuwan karkuwan, miŋ kurayen kurayen, sikken umŋa kurayen kurayen, irde merem kurayen kurayende mat watiŋ. Mel gobe amil fayken hor yirdeb Doyaŋ Al Kurunyen keperd keperd gasunya Sipsip dirŋenyat diliŋ mar huwarde patila yuwalŋen yanarde hinhan.^h ¹⁰Irde kuware po,

“Dumulgaŋ teŋ teŋ mata gobe Al Kurunnininŋa Sipsip dirŋenŋa hitte mat watiŋ.

Al Kurunbe Doyaŋ Al Kurunyen gasunde keperde hi!” yamiŋ.

¹¹Be, Al Kurunyen miyoŋ beleŋ tumŋaŋ Doyaŋ Al Kurunyen keperd keperd gasunya Al Kurunyen alya bereyat doyaŋ marte parguwakyabe det binfut miŋyaŋ sipteya goyen gote harhokde huwarde milgu yiramiŋ. Irdeb Doyaŋ Al Kurunyen keperd keperd gasuŋ beleŋ goŋ diliŋ mar wulgurut yeŋ kimiŋ megen irde Al Kurun doloŋ iramiŋ. ¹²Doloŋ irde heŋyabe gaha yamiŋ:

“Fudinde wor po!

Al Kurun isoka irde deŋem turuŋ yaŋ irde hitek!

Dufay wukkekyatareŋya saŋinyabe hugiŋen

Al Kurunnininde po henayiŋ.

Yeŋ po ga igiŋ nurd uneŋ palap irde hitek!

Fudinde wor po!” yamiŋ.

¹³Be, go kamereb Al Kurunyen alya bereyat doyaŋ marte parguwak 24 bana goŋ niŋ al kura beleŋ, “Al buda amil fayken hor yirtiŋ mar gabe ganuŋ? Irde mel gabe damde mat watiŋ?” nineŋ gusuŋaŋ niryiŋ.

¹⁴Irkeb ne beleŋ wol heŋbe, “Doyaŋ al, gebe nurde ha,” inmiriŋ. Irkeb yeŋ beleŋ, “Al buda gabe kanduk kurun yeneŋ hinhan gega, saŋiŋ heŋ watiŋ mar. Mel gabe amil hor yirtiŋ goyen Sipsip dirŋende dari beleŋ po halde faykek wor po yiramiŋ. ¹⁵Gwahade ningeŋ mel gore Al Kurunyen ya balem bana heŋ Doyaŋ Al Kurunyen keperd keperd gasunde goŋ diliŋ mar naŋkahalya wawunya doloŋ ird ird mata teŋ hanŋen. Irkeb Doyaŋ Al Kurunyen keperd keperd gasunde keperde hi al gore mel goya heŋ yufukde yerde doyaŋ yirde hiyeŋ. ¹⁶Irkeb mel gobe sopte binge ma kamnayiŋ, irde fe niŋ ma yiryen. Irde naŋa ma, kak uka wor po kura gore epte ma buluŋ yiryen. ¹⁷Gobe Sipsip dirŋen, Doyaŋ Al Kurunyen keperd keperd gasuŋ kahalte hi al gore sipsip doyaŋ al yara heŋ mel go doyaŋ yirde hiyeŋ geb, epte ma buluŋ henayiŋ. Yeŋ beleŋ mel go bul yirde Al Kurunya hugiŋen heŋ heŋ fe forok yeŋ hanŋen gasunyaŋ

^h 7:9 Patila yuwalŋenbe al buluŋ fole irtiŋ goke yitiŋ.

yukuyen. Irkeb Al Kurun belen mel gote diliŋ fimiŋ tumŋaŋ halde yunyen,” ninyiŋ.

Asaŋ bili irtiŋ unguni tareŋ yirtiŋ goyen funaŋ ukala tiyyiŋ

8 ¹Be, Sipsip dirŋen belen asaŋ ulyaŋ bili irtiŋ goyen unguni tareŋ yirtiŋ 7 bana goyen funaŋmiŋ ukala tiyyiŋ. Irkeb 30 minit gwahade Al Kurunyen gasuŋde migiriŋ miŋmoŋ, diŋden iramiŋ. ²Go kamereb Al Kurun diliŋ mar miyoŋ 7 huwarde haŋyen goyen yinmiriŋ. Miyoŋ gobe bigul 7 yunke yanaramiŋ.

³Irkeb Al Kurunyen miyoŋ hoyaŋ kura belen det hamŋen yaŋ kumga teŋ teŋde niŋ koron gol hora belen po irtiŋ goyen teŋbe Al Kurun galak ird ird alta diliŋ mar huwariŋ. Yeŋbe Doyaŋ Al Kurunyen keperd keperd gasuŋ diliŋ mar alta gol po irtiŋ go hende det hamŋen igiŋ kumga teŋ teŋ goyen kurun po yawariŋ. Gobe Al Kurunyen alya bereya mere ird haŋyen mar goya gabu yirde Al Kurun galak ire yeŋbe gogo tiyyiŋ. ⁴Irdeb det hamŋen yaŋ goyen kumga tike kaki goya Al Kurunyen alya bereya belen mere ird haŋyen goya tumŋaŋ gabu heŋ Al Kurun hitte hurkuriŋ. ⁵Irke gab miyoŋ gore det hamŋen kumga teŋ teŋde niŋ koron goyen teŋbe alta hende kak hinhiŋ goyen fariŋ. Irdeb goyen teŋ megen timiyyiŋ. Irkeb dagamel teŋ daga kateŋ hururun teŋ niniŋa tiyyiŋ.

Bigul 7 mere tiyamiŋ

⁶Be, gor matbe haŋkappa Al Kurunyen miyoŋ 7 gore bigul 7 yawaramiŋ goyen fu yirniŋ tiyamiŋ.

⁷Be, miyoŋ 7 bana goyen meheŋde niŋ gore wa bigulmiŋ fu iryiŋ. Irkeb kigariŋ bilmiŋ hora yara goya kak dariya suluk irtiŋya goyen kigariŋ kattin yara kurun po katiŋ. Irkeb megen kurun gayen kurar kurar humga kuriŋ. Humga kuriŋ gobe megen gayen patke karwo hiyyen, ird unkuŋenbe humga kuyen go gwahade hiriŋ. Irde he megen haŋ manan gwahade po tiyamiŋ. Irde yamuŋbe tumŋaŋ humga kwamiŋ.

⁸Be, go kamereb miyoŋ 7 bana goŋ hoyaŋ kura belen bigulmiŋ fu iryiŋ. Gwaha irkeb det kura dugu kurun kak humga kuŋ hinhiŋ yara goyen makaŋ alare timiytiŋ kinmiriŋ. Irkeb makaŋ ala kurun kurhanbe dari hiriŋ. Gobe makaŋ ala pota yirke karwo hitiŋ goyen unkuŋenbe dari hiyyen go gwahade goyen. ⁹Irkeb makaŋde niŋ det biŋfut miŋyaŋ pota ird buda karwo yirtiŋ bana goŋ buda unkuŋenbe tumŋaŋ kamamiŋ. Irde hakwa yago manan pota ird buda karwo yirtiŋ bana goŋ buda unkuŋenbe gwamuŋ yuryen go gwahade yiriŋ.

¹⁰Be, go kamereb Al Kurunyen miyoŋ 7 bana goŋ karwomiŋ belen bigulmiŋ fu iryiŋ. Gwaha irkeb dinambe kurun miliŋ wor po hulsi melak heŋ hi yara gore naŋkiŋde mat fe karkuwaŋya fe mukŋenya hende katiŋ. Gobe fe karkuwaŋya fe mukŋenya gabu yirde buda karwo yirtiŋ

bana buda un̄kuren̄ go hende katyen̄ go gwahade goyen. ¹¹Dinambe gote deŋembe “Urek”. Dinambe gore katkeb fe buda gobe urek hamin̄. Irke al budam wor po fe urek hitiŋ go nene kamamin̄.

¹²Be, go kamereb miyon̄ 7 bana goŋ siptemin̄ beleŋ bigulmin̄ fu iryiŋ. Irkeb naŋa diliŋ goyen pateŋ karwo irke un̄kuren̄be det kura beleŋ mayke aymuk iryiŋ. Gagasiya dinambe yagoya manan̄ gwahade po bulun̄ hamin̄. Irkeb saŋin̄min̄be saŋiŋ heŋ haŋkapy aŋat urde haŋyen go gwahade moŋ, kidomak hiriŋ. Niŋgeb naŋa fay bana goŋ naŋa keŋkela ma temeyde hinhin, kidomak po hinhin. Wawun̄ wor gagasiya dinambeya keŋkela ma temeyde hinhan, kidoma bulun̄ po hinhin.

¹³Be, go kamereb buntulun̄ kura naŋa kota hende hoyan̄ foy teŋ hike kinmiriŋ. Buntulun̄ gore hokde po, “Mata kafuram wor po! Mata kafuram wor po! Al Kurun̄yen miyon̄ hoyan̄ karwo haŋ gore bigulmin̄ fu yirkeb mata alya bereya meŋen haŋ mar hitte forok yenayiŋ gobe kafuram wor po!” yiriŋ.

9 ¹Be, go kamereb Al Kurun̄yen miyon̄ 7 bana goŋ sipteson̄on̄min̄ beleŋ bigulmin̄ fu iryiŋ. Irkeb dinambe kura bikkeŋ naŋkin̄de mat meŋen katiŋ goyen kinmiriŋ. Dinambe gobe mete dukun̄ wor po kimyan̄ min̄moŋ bana goŋ kurkun̄ kurkun̄ yame hol ird irdde niŋ ki untiŋ. ²Irkeb dinambe gore mete dukun̄ wor po bana goŋ kurkun̄ kurkun̄ yame hol iryiŋ. Irkeb kaki beleŋ kak tupi kurun̄de mat kaki waŋ hiyen go gwahade goyen pul yeŋ wayyiŋ. Mete dukun̄ wor po bana mat kaki watiŋ gore naŋa diliŋya naŋkin̄ya pet tike kidoma hiriŋ. ³Irkeb gusu budam wor po kaki bana mat meŋen kateŋ hinhan. Gusu gobe misiŋ kalpaŋ beleŋ al yiŋeŋ haŋyen gote tareŋ yara yuntiŋ. ⁴Gusu gobe yamuŋya busa asaŋyabe he yago meŋen haŋ goyen bulun̄ ma yirnayiŋ yintiŋ. Gega alya bereya Al Kurun̄ beleŋ kimin̄de soŋ ma yirtiŋ mar go po ga yisinayiŋ yintiŋ. ⁵Goyenpoga gusu gobe al yisike kamde kamde saŋiŋ ma yuntiŋ. Yisike gagasi sipteson̄on̄ bana uliŋ misiŋ kurun̄ po kattek tareŋ po yuntiŋ. Uliŋ misiŋ bulun̄ po katnayiŋ gobe misiŋ kalpaŋ kura gore al yisike misiŋ bulun̄ po nurde haŋyen go gwahade goyen. ⁶Gusu beleŋ yisike gagasi sipteson̄on̄ uliŋ misiŋ bulun̄ po kateŋ hinayiŋya gobe kamde kamde niŋ wor po nurde hinayiŋ gega ma kamnayiŋ. Mel gobe kamtek wor po yirde hiyeŋ gega, kamde kamde beleŋ yeneŋ yilwa yiryen̄.

⁷Be, gusu gobe fulen̄are kuŋ kuŋ niŋ hos yara gitik yirtiŋ yinmiriŋ. Gusu go tonan̄ hendebe det kura doyan̄ al kurun̄yen tonan̄hor gol beleŋ po yirtiŋ goyen hor yirtiŋ hinhan. Irde dinsokbe alyen yara yinmiriŋ. ⁸Irde tonan̄ yuwalŋen̄be sobam bereyen yara hinhan. Irde misiŋbe dapŋa kafuram wor po kura laion gote misiŋ yara yinmiriŋ. ⁹Irde dumun̄debe dari mala pet teŋ teŋde niŋ det ain parwek goyen yirtiŋ. Irde foy teŋ kuŋ hike tapeŋ gote migiriŋbe kurun̄ wor po. Migiriŋ gobe fulen̄are niŋ nima hos beleŋ yulun̄ teŋ haŋyen budam wor po fulen̄are kuŋ hike naŋa

migirin kurun wor po forok yen hanjen go gwahade goyen. ¹⁰Gusu buda gobe gifirin manan, irde gifirin murunde gorbe misin kalpan gote misin hinhan. Gifirin murunde gorbe al yisike gagasi siptesonon ulin misin kattek sanin minyan. ¹¹Be, gusu goyen doyan yird yird al kura hinhin. Al gobe Satanyen miyon, mete dukun bana wor po mat watin al. Denembe Hiburu mere mat Abadon, munan Grik mere matbe Apolion.ⁱ

¹²Be, mata kafuram mehenje nin wor pobe gago fole tike hubu hihi. Mata kafuram irawabe kame forok yerej tahar.

¹³Be, Al Kurunyen miyon 7 bana gon 6min gore bigulmin fu iryin. Irkeb Al Kurun galak ird ird alta gol belej po irde Al Kurun dilin mar hitin gote murun sipte kurhan kurhan gon hirkam hinhande matbe al melak kura forok yeke nurmirin. ¹⁴Al melak gore miyon gayamun ga bigul fu iryin goyen, “Satanyen miyon sipte Yufretis fe bana fere yirtin goyen yad sinja yirayin,” inyin. ¹⁵Irkeb Al Kurunyen miyon gore Satanyen miyon sipte fere yirtin koyare hinhan goyen yad sinja yiryin. Miyon sipte gobe koyare hen henbe megen nin alya bereya pota yirde buda karwo yirtin bana gon buda unken gasa yirke kamnayin yen nalu kirtin goyen forok yekeb gogo yad sinja yiryin. ¹⁶Be, fuleja mar hos hende kun hinhan gobe 200 milion gwahade yeke nurmirin.

¹⁷Be, hosya go hende kun hinhan marya goyen yuwarwarte yinmirinbe gahade: dari mala pet ten tenje nin det ain parwek dumunde yirtin gobe bukkenhel yitin, irde kurabe digulakya halkenja mun kura suluk irtin, irde kurabe wulsakken salfa hora gwahade yara yirtin. Hos gote tonanbe laionyen tonan yara. Mohonde matbe kak, kakiya salfa hora uka wor po hen buk yitinja goyen wan hike yinmirin. ¹⁸Hos go mohonde mat det bulun karwo kak, kakiya salfa hora uka wor po hen buk yitinja gore alya bereya megen han goyen budam wor po gasa yirke kamamin. Kamamin mar gobe megen nin al tumnan pota yirde buda karwo heke buda unkenbe gasa yirke kamnayin go gwahade goyen. ¹⁹Hos gote tarebe mohonya gifirinja goyenter hinhin. Gifirinbe kunere yara, irde murun belebe kunere tonan minyan ala. Gifirin gore al gasa yirde dagim yan yirde hinhan.

²⁰Be, alya bereya det bulun karwo kak, kakiya salfa hora buk yitin hos mohonde mat wan hinhan gore ma gasa yirke kamamin mar gobe yingen mata bulun ten hitin goyen yubul ma ten Al Kurun nin bin mulgan ma hamin. Go mar gobe ungura dolon yird yird mataya det tonej gol, silwa, baras, horayab heya belej po yirtin goyen dolon yird yird mataya goyen bada ma hamin. Det tonej gobe epte ma nankennayin, mere ma nurnayin, irde kun wan ma tinayin gega, Al Kuruninin yen nurde dolon yirde hanjen. ²¹Irde al gasa yirke kamde kamde mata, merebal kurayen

ⁱ 9:11 Abadonya Apolionyat minbe gwamun yurd yurd al.

kurayen, leplep matayabe kawē mataya teŋ haŋ goke Al Kurun pohogay irde yeŋ ge biŋ mulgaŋ ma haŋin.

Al Kurunyen miyon kuraya asaŋ bili irtin dirŋen kura goya

10 ¹Be, go kamereb Al Kurunyen miyon hoyan kura tareŋmin kurun wor po gore Al Kurunyen gasunde mat megen kateŋ hike kinmirin. Yeŋbe kigariŋkin faykek wor po beleŋ aw urtin, irde gamatsawbe tonan hende hinhin. Tonan hende hinhin goyenbe tonan sisaŋ ma urde hinhin. Kiminbe naŋa timiytin yara agat urde hinhin. Irde kahanbe hora beleŋ po tola yirtin humga kun buk yeŋ hanŋen go gwahade hinhin. ²Hanindebe asaŋ sobam bili irtin dirŋen kura goyen digiltin hinhin. Irde kahan yasebe makan alare huwardeb kahan tapabe siŋa fudinde huwariŋ. ³Irdeb laion beleŋ mere kurun po teŋ hanŋen yara kuware wor po mere tiyiŋ. Gwaha tike gab daga 7 mere tiyamin. ⁴Daga 7 mere tikeb ne beleŋ meremin goyen asaŋde kayen timirin. Gega al melak kura forok yeŋbe, “Daga 7 mere tahaŋ goyen goya ma kayariŋ, mere gobe banare po hinayiŋ,” niniŋ.

⁵Be, Al Kurunyen miyon makan alareya megenya huwarde hike kinmirin gore Al Kurun palap ire yeŋ hanin yase isaŋ hiriŋ. ⁶Irdeb Al Kurun deŋe urdeb biŋa saŋin po tiyiŋ. Al Kurun, huginŋen hiyeŋ al, nanŋin, megen, makaŋyabe det kurun gayen yiriŋ al gote deŋe urde biŋa teŋyabe, “Al Kurun beleŋ dufaymin bikkeŋ kiriŋ gote igineŋbe heŋ ga moŋ forok yiyyen. Nalu singir singir ma iryeŋ! ⁷Goyenpoga Al Kurunbe mere basaŋ marmin yiniŋ gwahade goyen po, miyonmin 7 bigul yawaramin bana goŋ funanmin beleŋ bigulmin fu irke gab Al Kurun beleŋ dufaymin kiriŋ banare hitin gote igineŋ kawan forok iryeŋ,” yiriŋ.

⁸Irkeb al melak kura nanŋinde mat hanŋkapa nurmirin gore sopte po gahade niniŋ: “Al Kurunyen miyon makaŋya megenya hende huwarde hi gote haninde asaŋ digiltin hi goyen kun tawa,” niniŋ.

⁹Irkeb nebe Al Kurunyen miyon go hitte kunbe asaŋ goyen nuni yeŋ gusaŋan irmirin. Irkeb miyon goreb, “Asaŋ ga teŋ nawa. Gabe mohongerbe yalanŋu fimin hapek yaŋ go gwahade nurayiŋ gega, bege bana kurkunbe beger tigiri tiyyen,” niniŋ. ¹⁰Irkeb asaŋ dirŋen goyen Al Kurunyen miyon gote haninde mat teŋbe nimirin. Teŋ nemeke mohongerbe yalanŋu fimin yara hapek yaŋ nurmirin gega, nukuluk urmekeb kurkun benerbe tigiri tiyiŋ. ¹¹Gwaha timekeb al melak gore, “Gebe alya bereya, naŋa karkuwan, merem hoyan hoyan, irde megen nin doyan mar karkuwanbe kame dahade hinayiŋ goke Al Kurunyen mere basaŋ heŋ tagalaiŋ,” niniŋ.

Al Kurun nin tagal tagal al irawa

11 ¹Be, go kamereb det kurayen kurayen karkuwanmin dahade goyen tunan teŋ teŋde nin kutum kura nuneŋbe gaha niniŋ:

“Kun Al Kurunyen ya balemya Al Kurun galak ird ird altaya gote kurunmin tunan tiyayin. Irde ya balem bana gon Al Kurun dolon irde han mar goyen kapyan hawayin. ²Goyenpoga Al Kurunyen ya balem koya kirtin bana goyen sinak bele matbe sawsawa kura gabu ird ird gasun hi gobe tunan ma tiyayin. Gasun gobe al min hoyan Yuda mar mon goyen wan gabu irde hanyen gasun geb gago dinen hime. Go mar gore gagasi 42 gayen Yerusalem taun Al Kurun dilinge wukken kenen hiyen goyen ufurka ten bulun bulun irnayin. ³Nebe ne nin ten tagalde hiriryen al irawa kura sanigne yunenbe yad yermeke wayiryen. Wanbe amil kerkek hor irdeb merene basan hen nana fay 1,260 gwahade goyen tagalde hiriryen” ninyin.

⁴Be, Al Kurun nin mere ten ten al irawa gobe olip he irawaya hushi irawaya Doyan Al Kurun din mar huwarde haryen go goyen. Doyan Al Kurun gobe alya bereya megen han kurun gate Kurunmin. ⁵Al irawa goyen al kura bele bulun yirnin yen tunan yurnayinbe al irawa gote mohonde mat kak forok yen asogom mugol kiryen. Al kura irem go bulun yirnin yen tunan yurnayin marbe gwaha mat kamnayin. ⁶Irem gobe Al Kurunyen mere basan hen tagalde henya kigarin goya katen ma yen nanjin pet ten ten taren minyan. Irde fe kurun gayen yigiri tike dari hetek sanin wor go minyan. Irde mata kafuram al bulun yirtek goyen kurayen kurayen forok yirde alya bereya megen han gayen igin gwamun yurtek taren wor go minyan. Irem gobe gwaha yirye yenbe igin gwahade po yirtek sanin minyan hinaryum.

⁷Be, irem go Al Kurunyen mere tagalde pasi hekeb dapna kafuram kura mete dukun wor po kimyan minmon bana gon mat watin gore irem goya arnayin. Irde irem go fole yirde gasa yirke kamiryen. ⁸Irkeb irem go kamtin hakwambe taun kurun Yerusalem bana gon nin bele kurunde gor yubul tike hiriryen. Taun gokeb Sodom yara ma Isip yara yen hanyen gogo. Taun goyenterbe bikken al irawa gote Doyan Al Kurun wor mayke kamyin. ⁹Irkeb nana karkuwan karkuwan, al min kurayen kurayen, meremin kurayen kurayen, irde sikken umna kurayen kurayen nin alya bereya bele irem gote ulin hakwam wawun karwoya nana fay sipteya goyen belen yubul titin yennayin. Irde hakwam goyen mete ten ten nin pinen henayin. ¹⁰Megen han marbe tumnan irem go kamke ayan yerdeb detmin yingen ulin murungem mon dulin kadam gunen tinayin. Al Kurunyen mere basan mar irawa gore megen nin mar kanduk kurun forok ird yunke bin misin nurde hinayin geb, irem go kamkeb gogo aman henayin.

¹¹Be, nana fay sipteminde nankahal hekeb al yisan hen hen mene Al Kurun hitte mat katen irem go binde hurkukeb sopte geren hen huwararyum. Irkeb alya bereya tumnan irem go yenenbe kafura wor po hamin. ¹²Irkeb al melak kura kurun wor po nanjinde mat, “Hende

gar wayyi” yeke Al Kurunyen mere basan mar irawa gobe nuraryum. Nurdeb asogom belen yenen hikeya Al Kurunyen gasunde kigarinjin faykek hende hurkaryum. ¹³Goya goyenbe niniya kurun wor po forok yirin. Irkeb Yerusalem taun go bulun hiri. Bulun hiri gobe taun goyen walka ten 10 irde unjkurebe bulun hiri go gwahade goyen. Bulun hiri bana gonbe 7,000 alya bereya kamamin. Go ma kamamin marbe kafura wor po hen Al Kurun tarenmin kurun wor po goyen denem turun yan iramin.

¹⁴Be, mata kafuram kahalte ninbe gogo hubu hiri. Gega mata kafuram hoyan funan karwominbe hen ga ma wayen tiya!

¹⁵Be, Al Kurunyen miyon 7 bigul yawaramin bana gon miyon funan belen bigulmin fu iryin. Irkeb al melak budam kurun wor po nanjinde mat forok yenbe, “Gayenter alya bereya megen han kurun gayen doyan yird yird sanjinbe Doyan Al Kurunya yen belen basina irtin al Mesaiayat haniinde hi. Yen belen gwahader doyan yirde hiyen!” yamin. ¹⁶Irkeb Al Kurunyen alya bereyat doyan marte parguwak 24, Al Kurun dili mar keperde hinhan gore wulgurut yen kiminbe megen yirde Al Kurun dolon iramin. ¹⁷Gwaha irde hen yabe,

“Doyan Al Kurun, gebe Al Kurun, tarenge kurun wor po.

Gebe bikken hinhan, gayenter wor ha.

Gebe sanjinbe kurun goyen ten alya bereya doyan yird yird meten min urarin.

Ningeb goke igin wor po nurd gunen hite.

¹⁸Ge ma nurd gunen han mar belen ge nin bin ar yen hinhan.

Gega bege ar yetek nalube gago forok yihi.

Al kamtin merere huwartek nalube gago forok yihi.

Meten marge, merege basan hen hen mar, alya bereyage, irde palap girde han mar tumnan matamin gote murungem yunen yunen nalube gago forok yihi.

Al denem yan ma al denem mon goyen tumnan murungem yunen yunen nalube gago forok yihi.

Alya bereya megen han kurun gayen bulun yiramin mar goyen mugol kertek nalube gago forok yihi!” yamin.

¹⁹Be, Al Kurunyen ya balem gasunminde hi gote yame fegelke hol yirin. Irkeb bana gonbe Al Kurunyen Bina ten ten Bokis hike kinmirin. Irkeb dagamel ten daga katen hururun ten hinhan. Irde niniya forok yeke kigarin hora yara hitin goyen kurun po katyin.

Bereya asogomin deregonya

12 ¹Be, gwaha tikeb mata tinen kura matamnen nanjinde forok yirin. Mata gobe gahade: bere kura nana dili ten amil hor irtin yara irde gagasi hende huwartin hinhan. Irde dinambe 12 belen

doyaŋ alyen tonaŋhor irtin goyen teŋ tonaŋde hor irtin hinhin. ²Bere gobe biŋ miŋyaŋ, irde dirin kawaŋ kere yeŋ ulin misiŋ kurun katen esen hinhin. ³Irkeb naŋkinde mata hoyan kura forok yirin. Mata gobe gahade: deregon kurun miliŋ wor po sikkenbe bukken, irde tonaŋ 7 miŋyaŋ goyen forok yirin. Tonaŋ 7 gobe doyaŋ al karkuwande tonaŋhor 7 goyen tonaŋ 7yaŋ goyaŋ yirtin ala hinhan. Deregon gobe hirkam 10 miŋyaŋ. ⁴Deregon gobe singili teŋ naŋa kor irtin yara gifirin temeyde dinambe kwer yurke budam wor po wok yeŋ megen katamin. Dinambe katamin gobe naŋkinde dinambe kurun goyen tumnaŋ buda karwo yirde unkukenbe wok yeŋ katnayaŋ go gwahade goyen tiyamin. Be, deregon gobe bere gore dirin kawaŋ kerkeb goyare po dirin go neweŋ yeŋ bere go dirin kawaŋ kereŋ teŋ hinhin gote kimiŋ mat pet teŋ hinhin. ⁵Be, bere goyen dirin al dirin kawaŋ kiryin. Dirin gobe doyaŋ alyen kutum ain beleŋ po irtin goyen tanarde naŋa karkuwan karkuwan tumnaŋ doyaŋ yiryen albe gogo. Ningeb deregon gore dirin go niyyenkek yenbe bere gote dirin goyen araŋ po teŋ Doyaŋ Al Kurunyaŋ keperd keperd gasuŋ Al Kurun keperde hinhinde gor tukuke gor hinhin. ⁶Be, bere gobe busahardeb sawsawa po kurun naŋa bana goŋ gasuŋ kura Al Kurun beleŋ bere goke teŋ gitik irtinde gor kurin. Gasuŋ gobe Al Kurun beleŋ bere goyen naŋa fay 1,260 gahade doyaŋ irde paka ireŋ yeŋ bikken gitik iryin go goyen.

⁷Be, Al Kurunyaŋ gasunde fuleŋa kurun forok yirin. Al Kurunyaŋ miyonya doyaŋ almin Maikelya beleŋ deregon goya yende miyomniya aramin. ⁸Goyenpoga deregon gobe Al Kurunyaŋ miyon epte fole yirtek tareŋ minmon geb, deregon goya miyomniyabe Al Kurunyaŋ gasunde mat yakira tikeb gasuŋ minmon hamin. ⁹Be, deregon gobe takira tikeb megen katyin. Deregon gobe kunere bikken hinhin go goyen. Gobe denem kurabe Ungura, kurabe Satan inen hanyen. Yeŋ beleŋ alye bereya megen haŋ kurun gayen usi yirke mata bulunde katen hanyen. Deregon go temeyke megen katyinyabe miyomin yago manan tumnaŋ katamin.

¹⁰Be, go kamereb al melak kurun wor po naŋkinde mat forok yeke nurmirin. Merebe gahade: “Kadninin merem yaŋ yird yird al gobe gogo takira tike megen kata. Huginen wawunya naŋkahalya Al Kurun hitte kadninin merem yaŋ yirde hiyen al gobe teŋ temeyke megen kata. Ningeb gayenterbe Al Kurunninin beleŋ alye bereya yumulgan tiyyen. Al tumnaŋ yende tareŋ bana hinayin. Yeŋ beleŋ doyaŋ yird yird nalube gago forok yihi. Mesaia Al Kurun beleŋ basaŋa iryin al gote saŋin manan forok yihi. ¹¹Mel gobe Sipsip dirnen gore darim wok irde kamiŋ go hende huwarde al bulun go fole irtin. Irde mere fudinde po kawaŋ tagaldeb al bulun go fole irtin. Ningeb mel gobe mudunke kamnin wor igin ala yeŋ nurde ga hinhan. ¹²Ningeb den Al Kurunyaŋ gasunde haŋ mar tumnaŋ aman henayin. Goyenpoga den megenya makanyabe Satan

denj hitte kurka geb, goke kafuram wor po nurde dunhem. Yenbe nalu ulyande ma hiyen goyen nurde hi geb, goke bin ar wor po yen hi,” yirin.

¹³Be, deregon go Al Kurunyen gasunde mat tenj temeyke megen katyinj goyen bebak tiyyinj. Irdeb dirinj al dirinj kawanj kiriyinj bere goyen bulun bulun ire yen nankenen kuj hinhin. ¹⁴Bere gobe sawsawa po kurun nana bana gonj gasun kura Al Kurun belej gitik irde untinde gor foy tenj kuj kuj nin buntulun kurun wor po gote tapen irawa untinj. Gasun gobe bere goyen gor dama karwo irde gagasi 6 gayen gor po hike deregon gore epte ma bere goyen bulun iryen yen Al Kurun belej gitik iryin go goyen. ¹⁵Be, deregon goyen po goyenbe kunere kurun gogo. Goreb bere goyen figilu tiwi yen mohonde mat fe kurun wor po fur tiyyinj. ¹⁶Gega megen belej bere go faranj urde mohonj anj irde fe fur tiyyinj kurun goyen nen pasi hirinj. ¹⁷Irkeb deregon gobe bin ar wor po yeke bere gote dirinjminj yago go ma kamaminj megen hanj goya arninj yen kurinj. Go mar gobe Al Kurunyen saba gama irde Yesu nin yitij mere fudinde goyen kawan po tagalde hanjen mar go goyen. ¹⁸Be, deregon gobe makanj ferenje huwaryinj.

Dapna kafuram kura irawa forok yaryum

13 ¹Be, yen gor huwarde hike dapna duwi kafuram wor po kura makanj alare mat forok yeke kinmirinj. Dapna gobe hirkam 10 minjan, irde tonanbe 7 minjan. Hirkam go hendebe doyanj alyen tonanhor hor yirtinj ala hinhan. Irde tonan 7 go hendebe Al Kurun sukal irtinj deje goyanj katinj ala hinhan. ²Dapna duwi kafuram gobe dapna kura lepat inen hanjen goyen yara kinmirinj. Goyenbe kahanbe dapna kura bea inen hanjen gote kahanj yara, irde mohonde laion mohonj yara kinmirinj. Be, deregon gore dapna kafuram goyen sanjminj unyinj. Irdeb deje kurun unenbe doyanj al kurun iryin. ³Goyenbe dapna duwi kafuram gote tonan 7 goyen unjukanj kurabe kamtek ge mayaminj gega, geren hitinj goyen kinmirinj. Alya bereya megen hanj kurun gore kenenbe tonnenj yan wor po yen nurd unenbe gama iraminj. ⁴Albe deregon gore dapna duwi kafuram goyen doyanj al iryin goke deregon goyen doloj iraminj. Irde dapna duwi kafuram goyen wor doloj irdeb, “Ganun al belej epte dapna duwi kafuram gahade hiyyen? Irde ganun al belej epte yenya ariryen? Hubu wor po!” yaminj.

⁵Be, dapna duwi kafuram gobe yingenj ge turun turun tenj, Al Kurun sukal ird ird tarej untinj. Irde doyanj al henj dama karwoya gagasi 6ya gayen meten tenj tenj sanj untinj. ⁶Irkeb dapna duwi kafuram gore mohonj anj irde Al Kurun mere bulun mat irde Al Kurunyen denemya gasunminjya irde gasunminj bana hanj marya goyen nanyanj yiriyinj. ⁷Yenbe Al Kurunyen alya bereya goya arde fole yirtek sanj untinj. Irde alya bereya minj kurayen kurayen, sikkenj umna kurayen kurayen, mereminj

kurayen kurayen, irde naŋa karkuwaŋ karkuwaŋ kurun goyen doyaŋ yird yird tareŋ untiŋ. ⁸Irkeb alya bereya megen haŋ kurun gore dapŋa duwi kafuram goyen doloŋ irnayaŋ. Go mar gote deŋembe tumŋaŋ Al Kurunya hugiŋeŋ hitek marte deŋem naŋkiŋya megeŋya ma forok yekeya katiŋ asaŋ goyen bana ma haŋ. Asaŋ gobe al beleŋ mayke kamyiŋ al Sipsip diriŋeŋ gote asaŋ.

⁹Niŋgebe al kirmiŋ yaŋbe merene gayen nurde bebak tinayaŋ. ¹⁰Al kura fere teŋ koyare yerke hinayaŋ yeŋ Al Kurun beleŋ dufaymiŋ kirtiŋ marbe koyare hinayaŋ. Munan al kura fuleŋare niŋ bidilare gasa yirke kamnayaŋ yeŋ Al Kurun beleŋ dufaymiŋ kirtiŋ marbe gwaha mat po kamnayaŋ. Niŋgebe Al Kurunya alya bereyabe kanduk forok yenayaŋ kurun goyen goke mukku ma teŋ tareŋ po heŋ heŋ ge piŋeŋ ma heŋ hinayaŋ. Irde Al Kurun niŋ hekkeŋ nurtiŋ goyen saŋiŋ po tanarde hinayaŋ.

Dapŋa duwi kafuram hoyan kura forok yiriŋ

¹¹Be, alya bereya megen haŋ gore dapŋa duwi kafuram goyen doloŋ irde haŋ goyen kinmiriŋ go kamerebe dapŋa duwi kafuram hoyan kura wor megeŋ bana mat forok yeke kinmiriŋ. Yeŋbe sipsip diriŋeŋ yara hirkam irawa miŋyaŋ hinhin. Meremiŋbe deregonyen mere yara tiyyiŋ. ¹²Yeŋbe yiŋgeŋ ge teŋ dapŋa duwi kafuram meheŋde watiŋ gore saŋiŋ tiriŋ goyen teŋbe meteŋ tiyyiŋ. Irdeb megeŋya alya bereya megen haŋ goyen yinkebe dapŋa duwi kafuram meheŋde niŋ goyen doloŋ iramiŋ. Dapŋa kafuram meheŋde niŋ gobe bikkeŋ kamtek ge maytiŋ gega gereŋ hiriŋ go goyen. ¹³Dapŋa kafuram kame wayyiŋ gobe mata tiŋeŋ turun yaŋ wor po forok yiriŋ. Kurabe al beleŋ diliŋde kawan po keneŋ hikeya yeŋ beleŋ irke naŋkiŋde mat kak megen katiŋ. ¹⁴Yeŋbe dapŋa kadom meheŋde wayyiŋ gote diliŋ mar mata tiŋeŋ turun yaŋ forok yirdeb go hende huwarde alya bereya megen haŋ kurun gayen usi yiriŋ. Irde dapŋa duwi kadom kafuram fuleŋare niŋ bidilare dagim yaŋ irtiŋ gega go ma kamyiŋ goyen turun ird ird niŋbe dapŋa gote toneŋ irnan yinyiŋ. ¹⁵Yeŋbe dapŋa duwi kadom kafuram meheŋde wayyiŋ gote toneŋ irtiŋ goyen biŋfut miŋyaŋ ird ird saŋiŋ untiŋ hinhin. Gwaha irkeb toneŋ irtiŋ gore biŋfut irde mere tiyyiŋ. Gobe alya bereya det goyen doloŋ ird ird niŋ igiŋ ma nurde doloŋ ma iramiŋ mar goyen tumŋaŋ gasa yirke kamnayaŋ yeŋbe gogo meŋemiŋ fu iryiŋ. ¹⁶Irde dapŋa duwi kafuram kame wayyiŋ gobe al tumŋaŋ Satanyen alya bereya hitiŋ gote haniŋ yasere wet ma kimiŋde wet soŋ yird yird niŋ wor pakku yiriŋ. Al deŋem moŋ, al deŋem yaŋ, horam yaŋ mar, al siksukŋeŋ, irde al kurate meteŋ marya yiŋgeŋde dufayde meteŋ teŋ haŋ marya tumŋaŋ haniŋ yase ma kimiŋde soŋ yird yird niŋ pakku yiriŋ. ¹⁷Gogab al kura haniŋde ma kimiŋde soŋ yirtiŋ goyen hubu kenem epte ma det damu tinayaŋ, irde epte ma det yunke al hoyan beleŋ damu tinayaŋ. Al haniŋ yasere kurab kimiŋde

sonj yird yird gobe dapɲa duwi kafuram gote deɲem, kurabe deɲem gote namba.

¹⁸Niɲgeb albe mata goyen kenen igin bebak titek dufay wukken go minyaɲ ala hinayiɲ. Al kura keɲkela bebak teɲ teɲ tareɲ minyaɲ al gobe tubul tike dapɲa duwi kafuram gote namba gote miɲ bebak tinayiɲ. Namba gobe al unjkuren kura gote namba. Nambamiɲbe 666.

Sipsip al diriɲ diriɲnya al 144,000ya

14 ¹Be, go kamereb Sipsip diriɲ beɲ Saion doɲdoɲde huwarde hinhin goyen kinmiriɲ. Yeɲbe alya bereya 144,000 gote kimiɲdebe Sipsip diriɲ gote deɲemya Naniɲde deɲemya katiɲ mar goya dugure gor huwarde hinhan. ²Irkeb migiriɲ kurun kura naɲkiɲde mat forok yeke nurmiriɲ. Migiriɲ gobe fe hamulare solok yeɲ migiriɲ kurun teɲ hiyen go gwahade goyen, irde daga kateɲ hiyen go gwahade yara nurmiriɲ. Gega migiriɲ gobe kirmiɲner igin wor po nurmiriɲ. Tikiɲ heɲ heɲde niɲ det kura hap ineɲ hanɲen goyen kari yirde hike tikiɲ forok yeɲ hiyen gwahade yara nurmiriɲ. ³Hap goyen kari yiramiɲ mar gore Doyaɲ Al Kurunɲen keperd keperd gasunɲa det biɲfut minyaɲ sipte goya Al Kurunɲen alya bereyat doyaɲ marte parguwakya gote diliɲ mar huwarde tikiɲ gergeɲ kura hamiɲ. Tikiɲ gobe Sipsip diriɲnya hinhan mar 144,000 yeɲ beɲ megen mat yumulgaɲ titiɲ gore po gab tikiɲ go tuɲaɲ urde tikiɲ hetek hinhan. Al hoyanbe epte ma gwaha titek hinhan. ⁴Mel gobe bere hoyanɲa ma firtiɲ gwahade goyen po, det toneɲ al beɲ yirtiɲ goyen doloɲ ma yirde Al Kurun diliɲde wukken hitiɲ mar go goyen. Go mar gobe Sipsip diriɲ goyen hugiɲeɲ gama irde haɲ. Yeɲbe megen haɲ mar go bana goɲ mat basiɲa yirde det damu titiɲ yara Yesu darim wok irde kamiɲ gore yumulgaɲ titiɲ. Irdeb meteɲ gergeɲde niɲ biɲge meheɲde yawartiɲ goyen Al Kurun galak irde hanɲen yara mel goyen Al Kurunɲa Sipsip diriɲnya hitte galak yirtiɲ. ⁵Mel gobe usi mere kura ma titiɲ, irde uliɲde mere miɲmoɲ hinhan.

Al Kurunɲen miyoɲ karwo beɲ mere tagalamiɲ

⁶Be, go kamereb Al Kurunɲen miyoɲ hoyan kura naɲa kota foy teɲ hike kinmiriɲ. Yeɲbe megen haɲ mar hitte Yesu niɲ yitiɲ mere gwahader hitiɲ goyen momoɲ yirtek minyaɲ hinhin. Yeɲ beɲ naɲa karkuwaɲ karkuwaɲ, al miɲ kurayen kurayen, meremiɲ kurayen kurayen, irde al sikken kurayen kurayen goyen momoɲ yirtek mere igin minyaɲ hinhin. ⁷Be, miyoɲ gore kuware po, “Al Kurun beɲ alya bereya tumɲaɲ merere yertek nalu binde hihi geb, kafura irde deɲem turunɲ yaɲ irnayiɲ. Naɲkiɲ, megeɲ, makanyabe fe diliɲya forok yiryiɲ al goyen doloɲ irnayiɲ,” yiriɲ.

⁸Be, gwaha yekeb Al Kurunɲen miyoɲ hoyan beɲ kadom go gama irdeb, “Babilon taun kurun wor po gobe gwamuɲ urtiɲ! Bulun wor po

hitiŋ! Babilon gore alya bereya naŋa karkuwaŋ karkuwaŋ bana haŋ mar goyen nene kukuwa wor po hetek wain yunyiŋ. Wain gobe leplep matamiŋ go goyen,” yiriŋ.

⁹Be, gwaha yekeb Al Kurunyen miyoŋ hoyan kura gore kadam irawa goyen gama irde kuware po gaha yiriŋ: “Al kura dapŋa duwi kafuramya gote toneŋ irtiŋ goya goyen doloŋ yirde kimiŋde ma haniŋde dapŋa duwi gore nere yeŋ basiŋa yirde deŋem soŋ yirtiŋ marbe ¹⁰wain saŋiŋ wor po nene garbam buluŋ po heŋ haŋyen yara Al Kurunyen bearar kurun po kennayiŋ. Go mar goyen hittebe Al Kurunyen beararmiŋ kurun wor po fe wogortiŋ yara irde yunyeŋ. Irkeb go mar gobe Al Kurunyen miyoŋ yago wukkeŋ wor poya Sipsip dirŋeŋya diliŋ mar heŋ salfa hora humga kuŋ hi gore yisike uliŋ misiŋ kurun wor po kateŋ hinayiŋ. ¹¹Go mar go kumga yirde hiyen kak gote kakimbe gwahader waŋ hurkuŋ hiyeŋ. Niŋgeb al kura dapŋa duwi kafuramya gote toneŋ irtiŋ goya goyen doloŋ yirde haŋ mar, irde haniŋde ma kimiŋde dapŋa gote deŋem soŋ yirtiŋ marbe usaŋeŋ moŋ wawuŋya naŋkahalya hugiŋeŋ uliŋ misiŋ kateŋ hinayiŋ,” yiriŋ. ¹²Niŋgeb Al Kurunyen alya bereya sabamiŋ gama irde Yesu niŋ hekkeŋ nurd nurd mata ma tubul titiŋ maryabe kanduk budam yeneŋ goke mukku ma teŋ tareŋ po heŋ heŋ ge piŋeŋ ma heŋ hinayiŋ.

¹³Be, Al Kurunyen miyoŋ karwo gore mere tiyamiŋ go kamereb al melak kura naŋkiŋde mat gaha yiriŋ: “ ‘Gayenter mat al kura Doyan Al Kurun niŋ teŋ kamnayiŋ marbe Al Kurun beleŋ guram yirde saŋiŋ yiryen,’ gwahade kaya,” yiriŋ.

Irkeb Holi Spirit beleŋbe, “Fudinde, mel gore Al Kurun niŋ meten tahaŋ gote igineŋbe kawan forok yenayiŋ geb, mel gobe meten tareŋ po teŋ hitiŋ goyen yubul teŋ usaŋ heŋ hinayiŋ,” yiriŋ.

Megen bingge ep hitiŋ yad yad nalu forok yiriŋ

¹⁴Be, go kamereb delne mar kigariŋkiŋ faykek wor po forok yeke kinmiriŋ. Kigariŋkiŋ go hende al kura Al Urmiŋ yara goyen keperde hinhin. Tonanŋebe doyan al kurunyen tonanŋhor gol beleŋ po irtiŋ goyen hor irtiŋ, irde wit sak yeke walde walde bidila goyen haniŋde hike kinmiriŋ. ¹⁵Be, Al Kurunyen miyoŋ hoyan kura beleŋ Al Kurunyen ya balem bana mat siŋare kateŋ kuware po kigariŋkiŋ faykek hende kipirtiŋ hinhin al goyen inyiŋ. “Wit sak yeŋ yeŋ nalu forok yeke bidila teŋ walde yad buda yirde haŋyen yara, megen niŋ mar yad yad nalube gago forok yihi geb, alya bereya ge beleŋ yawartekbe yawara,” inyiŋ. ¹⁶Gwaha inkeb kigariŋkiŋ faykek hende keperde hinhin al gore bidilamiŋ temeyde walyiŋ. Alya bereya megen haŋ goyen yawaryiŋ.

¹⁷Be, go kamereb Al Kurunyen miyoŋ hoyan kura Al Kurunyen gasuŋmiŋde niŋ ya balem bana mat siŋare katyiŋ. Yeŋ wor bidila yaltiŋ kura haniŋde manan katyiŋ. ¹⁸Irkeb Al Kurunyen miyoŋ hoyan kura

sopte Al Kurunyen ya balem bana kak doyan irde hiyen gore Al Kurun galak ird ird altare mat wanbe bidila go tanarde hinhin miyon goyen kuware po iniyin. “Wain iginenbe fin hahan geb, bidilage misin yan go ten megen nin wain metende gor kurkun wain iginen walde yawara,” iniyin. ¹⁹Irkeb miyon gore bidilamin goyen temeyde wain iginen benekde walde yade wain gilyan hen hen gasunde yiriyin. Wain gilyan hen hen gasun gobe Al Kurunyen bearar go goyen. ²⁰Ningeb wain iginen gilyan hen hen gasun taun sinare hiyen goyenter yukun gilyan hitin yara Al Kurun ma nurd unen han mar go gilyan hen hen gasunde gor yerde karka tikeb darimbe figilu yara katen 300 kilomita gisaw wor po kutin. Dari beken figilu yara hitin gote dukunmin tunanenbe megen mat hurkun hos gote pukin al keperde hanjende go gwahader hiri.

Al Kurunyen miyon 7 beken mata kafuram 7 forok yiramin

15 ¹Be, go kamereb mata turun yan wor po hoyan kura nanjinde forok yeke kinmirin. Mata gobe gahade: Al Kurunyen miyon 7 beken mata 7 kafuram wor po tiyamin. Mata kafuram gabe Al Kurunyen bearar funan wor po goyen forok yetekbe gago. ²Be, go kamereb makan ala galas beken po irtin goya kakya suluk yirtin goyen kinmirin. Irde al kura dapna duwi kafurama gote tone irtin goyabe denemde namba 666ya goyen fole yirtin marbe makan sinare huwarde hike yinmirin. Mel gobe tikiinde nin det hap inen hanjen Al Kurun beken yuntin goyen yanartin hinhan. ³Irdeb Al Kurunyen meten al Mose beken tiki hitin goyen hamin. Sipsip dirnen goke tiki hitin goyen manan hamin. Tiki bilmin gobe gahade:

“Al Kurun, gebe Doyan Al Kurun, tarene kurun wor po.

Metengebe kurun wor po, irde turun yan wor po!

Doyan Al Kurun, gebe gwahader hitin.

Matagebe fudinde, irde huwak wor po.

⁴ Doyan Al Kurun, ganun al beken kafura ma girnayin?

Ganun al beken denge turun yan ma girnayin?

Ge po ga wukken wor po.

Matage huwak goyen alya bereya nana karkuwan karkuwan bana han mar goyen tumnan kennayin geb,
ge hitte po wan dolo girnayin,” yamin.

⁵Be, go kamereb Al Kurunyen gasunde nin ya balem bana gon gasun himam goyen yamemin kawan po hol yeke kinmirin. ⁶Be, ya balem bana gon mat Al Kurunyen miyon 7 gore mata 7 kafuram wor po goyen forok yirnin yen sinare katamin. Miyon gobe amil sobam faykek wor po milmulken goyen hor yirtin hinhan. Irde gol beken po kan yara irtin goyen dumunde bili irtin hinhin. ⁷Be, det binfut minyan sipte Doyan Al Kurunyen keperd keperd gasun milgu irtin hinhan goyen unken

kura beļeṅ kuwe gol beļeṅ po yirtin 7 goyen Al Kurunyen miyon 7 go yunyin. Kuwe 7 bana goṅbe gwahader hiyen al Al Kurun gote beararmin fe makin yirtin yara hinhan. ⁸Irke Al Kurunyen ya balem bana goṅbe Al Kurunyen deṅem turun yaṅ wor poya sanjinmin kurun wor poya goyen kawan forok yird yird kaki beļeṅ makin hiriṅ. Irkeb al kura epte ma ya bana goṅ hurkutek hiriṅ. Ya balem bana goṅbe Al Kurunyen miyon 7 gore mata kafuram 7 forok yirtek goyen hubu heṅ pasi yirke gab igin hurkutek hiriṅ.

Al Kurunyen bearar gote kuwe 7

16 ¹Be, go kamereb al melak kura Al Kurunyen ya balem bana goṅ mat kuware po Al Kurunyen miyon 7 goyen yinke nurmirin. Mereminbe gahade: “Kunaṅ. Kun Al Kurunyen bearar kuwe 7 bana haṅ goyen meṅen wogornaṅ,” yinyin. ²Be, gwaha yinkeb miyon meheṅde nin gore kun kuwemin goyen meṅen wogoryin. Irkeb usu yeneṅmin kafurama misinmin bulun wor poya goyen dapṅa duwi kafuram gote deṅe ulinṅde soṅ yirtin marya dapṅa gote toneṅ doloṅ irde hanṅen marya gote ulinṅde forok yaṅin.

³Be, Al Kurunyen miyon 7 goyen irawamin beļeṅ kuwemin makaṅ alare wogoryin. Wogorkeb makaṅbe al kamtinṅde dari yara hiriṅ. Irkeb makaṅde nin dapṅa tumṅaṅ kamamin.

⁴Be, Al Kurunyen miyon 7 goyen karwomin beļeṅ fe karkuwanṅanya fe dilinṅanya kuwemin wogorke dari po hiriṅ. ⁵Yeṅ beļeṅ gwaha tikeb Al Kurunyen miyon kura fe doyaṅ yirde hiyen goreb gaha yeke nurmirin: “Al Wukkek wor po, gebe hakot hinhan, gayenter wor ha. Ge beļeṅ al merem yaṅ yird yird gobe huwak wor po. ⁶Go yirha mar gobe gere alya bereya goya mere basaṅ margeya goyen gasa yirke darim wok yeṅ kamamin. Goke teṅ ge beļeṅ go mar goyen wolminṅen yirde dari nenan yeṅ yunha gobe gwaha yirtek po yirha,” yirin.

⁷Irkeb al melak kura Al Kurun galak ird ird altare mat forok yeke nurmirin. Mereminbe gahade: “Fudinṅde, Al Kurun, gebe Doyaṅ Al Kurun, tareṅgebe kurun wor po! Ge beļeṅ merem yaṅ yirde ha gobe fudinṅde mat yirde ha, irde huwak wor po teṅ ha,” yirin.

⁸Be, Al Kurunyen miyon 7 goyen siptemin beļeṅ kuwemin naṅa dilin hende wogoryin. Irkeb naṅa gobe tareṅ po temeyde alya bereya kumga yirtek sanjin minṅaṅ hiriṅ. ⁹Be, alya bereya gobe naṅa gote uka bulun wor po gore kumga yiryin. Irkeb go mar gore mata kafuram gwahade goyen doyaṅ yirde hi al Al Kurun goyen karan uramin. Irde mata bulunmin yubul ma teṅ Al Kurun nin bin mulgaṅ ma hamin. Irde Al Kurun deṅem turun yaṅ ma iramin.

¹⁰Be, Al Kurunyen miyon 7 goyen siptesonṅmin beļeṅ kuwemin dapṅa duwi kafuram gote keperd keperd gasun hende wogoryin. Gwaha

irkeb dapña duwi kafuram gore alya bereyamin doyan yirde hiyen naja kurun gobe kidoma beleŋ aw uryiŋ. Irkeb mel gobe kandukneŋ wor po nurdeb melak yisamiŋ. ¹¹Irdeb uliŋ misiŋ kateŋ haŋ goya usumiŋya goke teŋ Al Kurun saŋiŋmiŋ kurun wor po goyen karan uramiŋ. Irde mata bulunmiŋ yubul teŋ yeŋ ge biŋ mulgaŋ hetek ma yiriŋ.

¹²Be, Al Kurunyen miyoŋ 7 goyen 6miŋ beleŋ fe kurun Yufretis inen haŋyen go hende kuwemiŋ wogoryiŋ. Gwaha irkeb Yufretis fe kurun gobe pet yiriŋ. Gobe naja waŋ waŋ beleŋ mat doyan mar karkuwaŋ waŋ waŋ niŋ beleŋ kerd yune yeŋbe gogo fe goyen pet yiriŋ. ¹³Be, gor matbe det toneŋ bulun karwo kura huri yara goyen yinmiriŋ. Det toneŋ kurabe deregon mohon bana mat katiŋ, irde kurabe dapña duwi kafuram gote mohon bana mat katiŋ, irde funaŋbe Al Kurunyen mere basaŋ al falkuk gote mohon bana mat katiŋ. ¹⁴Det toneŋ gobe ungura, mata tiŋeŋ turnun yaŋ wor po goyen forok yirde haŋyen gote toneŋ. Toneŋ goreb Al Kurun watek nalu kurun goyenter asogo irde fuleŋa irniŋ yeŋbe megen niŋ doyan mar karkuwaŋ goyen yawaŋ gabu yird yird niŋ kwamiŋ.

¹⁵Be, goya goyenbe al melak kura forok yeke nurmiriŋ. Meremiŋbe gahade: “Ga nurnaŋ! Nebe al kura kawe al goyare wayeŋ tiya yeŋ ma nurde hikeya wayyeŋ go gwahade goyen tiyeŋ. Niŋgeb al kura kawe al goyare wayyeŋ yeŋ ma nurdeya ma ferde uliŋhormiŋ kerde pet titiŋde hiyeŋ go gwaha goyen, ne waŋ waŋ niŋ doyan heŋ keŋkela hinayiŋ marbe Al Kurun beleŋ guram yirde tareŋ yiryen. Gogab kawe al beleŋ waŋ bemel irke kupson al diliŋde kuŋ memya ma hiyyeŋ go gwahade goyen po, ne niŋ keŋkela doyan heŋ hinayiŋ mar wor memya ma henayiŋ,” yiriŋ.

¹⁶Be, go kamereb det toneŋ bulun beleŋ megen niŋ doyan mar karkuwaŋ gasuŋ kura Hiburu mere mat Amagedon inen haŋyende gor gabu yiramiŋ.

¹⁷Be, Al Kurunyen miyoŋ 7 goyen funaŋmiŋ beleŋ naja kota kuwemiŋ wogoryiŋ. Irkeb Al Kurunyen ya balem bana Doyan Al Kurunyen keperd keperd gasuŋde gor mat al melak kurun kura forok yeŋbe, “Gog po hubu hihi!” yiriŋ. ¹⁸Irkeb dagamel teŋ daga kateŋ hururun teŋ niniŋa kurun wor po forok yiriŋ. Al megen forok yamiŋde mat waŋ waŋ gayenter niniŋa gwahade kura ma forok yeŋ hitiŋ. Niniŋa gobe bulun wor po, niniŋa teŋ hitiŋ kurun gote folek wor po. ¹⁹Be, niniŋa go forok yekeb taun kurun Babilon gobe gilgaŋ irde karwo hamiŋ. Irde taun karkuwaŋ hoyan megen haŋ kurun goyen wor gwamuŋ yurtiŋ hinhan. Al Kurunbe Babilon/ taun kurunde niŋ mar gote mata bulun goke biŋ sir ma yiriŋ geb, mata bulunmiŋ goke bearar teŋ gwamuŋ yuryiŋ. Gobe beararmiŋ wain yuntiŋeŋ yiryiŋ. ²⁰Irkeb motmot tumnaŋ hubu hamiŋ, irde dugu

¹ 16:19 Babilonbe Rom niŋ yitiŋ.

wor hubu hamin. ²¹Irde nanƙinƙinde mat kigarin bilmin hora yara hitin gore al hitte kurun po katiyin. Kigarin bilmin unƙuren horam hitin gote kandukminbe 50 kilogram kanduk wor po. Be, kigarin hora yara hitin katiyin goke al belen Al Kurun karan uramin. Mata forok yirin gobe kanduk kurun wor po geb, gogo karan uramin.

Belen niƙ bereya Dapɗa duwi kafuramya

17 ¹Be, Al Kurunyen miyon 7 kuwe 7 yanartin mar goyen unƙuren kura belen ne hitte wanbe gaha ninyin: “Wake kure. Kun belen niƙ bere kura fe karkuwan budam hende keperde hi goyen daha mat Al Kurun belen gwamun uryen goyen gikala gire. Bere gobe taun kurun kura fe karkuwan kahalte irtin go goyen. ²Megen niƙ doyan mar karkuwan belen bere goya duwan ten ten mata ten han. Irde megen han marbe wain nene kukuwa hen han yen yara bere gote mata bulun goyen ulin bana hilyan kun pasi hekeb yende mata po gama irde bulun wor po hitin han,” ninyin.

³Be, Holi Spirit belen ketal nurkeb miyon gore sawsawa po kurun nana bana gon nukurin. Gorbe bere kura dapɗa duwi kafuram kura goyen hende kipirtin hiki kinmirin. Dapɗa gote ulinbe bukkenhel. Irde ulindebe Al Kurun sukal ird ird mere po makin hitin. Dapɗa duwi gobe tonan 7ya hirkam 10 minyan hinhin. ⁴Bere gote amil umna kurabe bukkenhel, irde kurabe bukken wor po mon digulakya suluk irtin^k yara goyen hor irtin hinhin. Irde golya hora kusamun damum hende wor poya gore po umna titin. Irde pal hora selwen yara damum hende wor po goyen manan yade ulin umna irtin hinhin. Bere gobe gisu gol belen irtin goyen hani yase belen tanartin hinhin. Gisu bana gonbe mata memyaka lelep mata mormokya goyen makin hitin hinhin. ⁵Bere gote kimindebe denem kura min banare hitin goyen katin hinhin. Denembe gahade:

BABILON KURUN, BELEN NIƙ BERE KURUN GATE MILIN, IRDE MEGEN NIƙ MARTE MATA BULUN GOTE MIN BIRIN

⁶Bere gore Al Kurunyen alya bereya budam gasa yirke kamamin. Irkeb bere gore dari goyen wain nene kukuwa hitin yara tiyyin goyen kinmirin. Mel gobe Yesu gama irkeb gogo gasa yirke kamamin.

Be, nebe bere go kenenbe kukuwamnen wor po nurmirin. ⁷Irkeb Al Kurunyen miyon nukurin goreb, “Danim kukuwamnen nurde ha? Bere gote min banare hinhin goyen momon giren. Irde dapɗa duwi kafuram tonan 7, irde hirkam 10 minyan, bere gore go hende keperde hi dapɗa duwi gote min wor momon giren. ⁸Be, dapɗa duwi kafuram wor po

^k 17:4 Bukkenya digulakya suluk yirke umna hoyan kura forok yen hiyen. Umna goreb doyan marte amil umna yirde han yen.

kenha gobe bikken hinhin. Gega gayenterbe go ma hi. Goyenbe kame mete dukun wor po kimyan minmon bana mat wan forok yiyyen. Forok yekeb mayke huginen kamyen. Goyenbe dapna go megen forok yekeb megen nin mar belen kenenbe dilin fot yenayin. Dapna gobe kamyin gega, sopte forok yekeb gogo kenenbe dilin fot yen aman henayin. Aman henayin mar gote denembe Al Kurun belen megenya nanjinya forok yiriyinde mat wan wan gayenter Al Kurunya hitek marte denem katin asanje gor ma han.

⁹“Ningeb mata forok yitin goyen beba tiye yenbe kenkela po dufay hawayin. Dapna duwi kafuram gote tonan 7be higilin 7 nin yitin. Higilin 7 go hendebe belen nin bere goyen keperde hiyen. ¹⁰Higilin 7 gobe doyan mar karkuwan 7 nin manan yitin. Doyan mar karkuwan 7 bana goyen siptesononbe bikken forok yenbe hubu hamin. Irde doyan al kurun unkenbe gayenter hi. Irde doyan al kurun funanbe hako wan hi. Yen wayyenbe nalu dolfonde po alya bereyamin doyan yirdeb hubu hiyyen. ¹¹Dapna duwi kafuram bikken kamtin geb, gayenterbe goyen ma hi gega, kame wayyen goreb doyan mar karkuwan 7 go kamereb al gergen kura forok yenbe doyan mar karkuwan 7 goyen basan hen doyan al kurun hiyyen. Gega al go wor doyan mar karkuwan 7 goya tunande. Irde kame bulun wor po hen hubu hiyyen.

¹²“Be, dapna duwi kafuram gote hirkam 10 yenha gobe doyan mar karkuwan hoyan 10 go goyen. Mel gobe alya bereyamin doyan yird yird tareh goyen ma yawartin han. Gega doyan mar karkuwanen sanin ten dapna duwi kafuram goya hen alya bereya doyan yirde hinayin gega, hen ga mon saninmin hubu hiyyen. ¹³Doyan mar karkuwan 10 gobe dufay unken po kerdeb alya bereyamin doyan yird yird tarehmin goyen gabu irde dapna duwi kafuram go po unnayin. ¹⁴Irde mel gore Sipsip dirnen goyen asogo irdeb fulea irnayin. Goyenpoga Sipsip dirnen gobe doyan marte Kurunmin, irde doyan mar karkuwan gote Kurunmin geb, mel goyen fole yiryen. Sipsip dirnen gote alya bereya yen belen hoy yirde basa yirdeb binde mat fudinde po gama irde han mar wor yenya gabu henbe doyan mar karkuwanya dapna duwi kafuramya goya arde fole yirnayin,” ninyin.

¹⁵Be, go kamereb Al Kurunyen miyon gore sopte gaha ninyin: “Fe karkuwan hende belen nin bere gore keperde hike yenha fe gobe al sikken umnam kurayen kurayen, al min hoyan hoyan, naja karkuwan karkuwan, irde al merem kurayen kurayen ten han mar go goyen. ¹⁶Be, dapna duwi kafuram goya hirkam 10ya yenha goreb belen nin bere goyen bin ar irnayin. Irde bere go bulun bulun irde detmin goran irde ulin umna manan yuguya tikeb kupson hiyyen. Irke bere gote gason talde neneb kak po kumba tinayin. ¹⁷Go tinayin gobe gwaha po tinayin yen Al Kurun belen dufay kirtin geb, gogo tinayin. Ningeb doyan mar

10 gore tareñmin tumñan gabu irde dapña duwi kafuram goyen unegbe gama irnayin gogo. Mel go gwaha teñ kuñ kuñbe Al Kurunyen mere gote iginen kawan forok yetek nalu goyen forok yiyyen. ¹⁸Be, belen niñ bere go kenha gobe taun kurun wor po go goyen. Megen niñ doyan mar karkuwan hoyan gobe yende yufukde han,” ninyin.

Babilon taun gobe bulun hiriñ

18 ¹Be, go kamereb Al Kurunyen miyon hoyan kura Al Kurunyen gasunde mat kateñ hike kinmirin. Yenbe denem yan wor po, ulinde matbe sañinmin hulsi yara forok yekeb megen kurun gayen wuk yen tukuriñ. ²Be, yen beleñ mere kurun po teñbe, “Babilon taun kurun wor po gobe gwamuñ urtiñ! Bulun wor po hitiñ! Irkeb taun gobe ungurayen gasun hitiñ. Irde det toneñ bulun wor bana gon han. Irde nu Al Kurun diliñde tikiñ minyan gore bana gon hagam yirde han. ³Nanja karkuwan karkuwan tumñan gobe nene kukuwa wor po hetek wain bere gore yuniñ. Wain gobe lelep matamiñ go goyen. Megen niñ doyan mar karkuwan wor bere goya feramiñ. Irkeb samun ya minyan han marbe bere gore det damum hende hoyan goyen yen hitte damu teñ hike hora kurun wor po yade hinhan,” ninyin.

⁴Be, go kamereb nanñinde mat al melak hoyan kura forok yeke nurmirin. Mereminbe gahade:

“Alya bereyane, bere belen niñ go tubul teñ kunañ.

Gogab yen mata bulun teñ hiyen gwahade ma teñ hinayin.

Irde matamiñ gote murungem bulun tiyyen goyen denya ma tenayin.

⁵Gobe bere gote mata bulunbe pipkatoka irke nanñin sisan urtiñ hinhin geb, gago dineñ hime.

Al Kurunbe mata bulunmin goke biñ sir ma yen hiyen geb, gago dineñ hime.

⁶Ningeb bere gore daha kura dirtiñ gobe gwahade po wol heñ unnañ. Yen beleñ bulun diriñ goyen wolminenbe yen beleñ dahade duntin goyen teban go hende kerde kurun po unnañ.

Yen beleñ gisuminde wain sañin duniñ goyen wolminenbe wain tareñ wor po yen beleñ irde duniñ gote folek goyen gisumin bana gon po wok irde unnañ.

⁷Bere go denem turun yan heñ det damum hende wor po goyen po yade aman heñ hinhin geb, dahade aman heñ hinhin gwahade po uliñ misiñ kateñ kanduk kurun wor po nurde hiyen.

Biñdebe yingen turun irdeb,

‘Nebe doyan bere kurun, irde beretap mon.

Ne hittebe kanduknen nurtek mata kura ma forok yiyyen,’ yen hi.

⁸ Ningeb nalu kurare kurab bere gobe matamiŋ gote muruŋgem buluŋ wor po tiyyeŋ:

Garbam buluŋ teŋ, biŋde kandukneŋ nurde, biŋge kamde hiyeŋ.
Irde kak beleŋ nen unyeŋ.

Al Kurunbe Doyaŋ Al Kurun tareŋmiŋ kurun wor po gore bere goyen merem yaŋ iryeŋ geb,
gogo gwahade forok yiyyeŋ,” yiriŋ.

⁹Be, al melak kura naŋkiŋde mat forok yiriŋ gore sopte gaha yeke nurmiriŋ: “Megen niŋ doyaŋ mar karkuwaŋ bere goya ferde bere gote samuŋ damum hende hoyan teŋ teŋ mata gama iramiŋ marbe bere go humga kuyeŋ gote kakim kennayiŋ. Irde yeŋ ge eseŋ obam teŋ hinayiŋ.

¹⁰Mel gobe bere go uliŋ misiŋ kurun kateŋ hike keneŋ kafura wor po heŋ gisaw po heŋ esiŋayiŋ. Irdeb, ‘Kafuram wor po! Kafuram wor po! Awo, taun kurun wor po Babilon! Bemel po uguŋ naluge forok yihi!’ yenayiŋ.

¹¹“Irdeb samuŋ ya miŋyaŋ marbe, ‘Detniŋiŋ kurun damu teŋ hiyeŋ berebe gogo hubu hihi geb, al gore kura detniŋiŋ damu titek moŋ,’ yeŋ nurdeb bere goke eseŋ obam teŋ hinayiŋ. ¹²Al kura gore waŋ mel gote gol, silwa, hora kusamuŋ wor po, pal hora selweŋ yara damum hende, irde amil faykek igiŋ wor po, amil umŋam bukkeŋya digulakya suluk yirtiŋ, irde silika amilyabe amil bukhel yitiŋ goyen damu titek berebe hubu hihi geb, goke esiŋayiŋ. He kurayen kurayen hamiŋ kusamuŋ wor po gore det yirtiŋ, irde kurabe dapŋa kura elefant gote bilŋam beleŋ po det kurayen kurayen yirtiŋ, irde he damum hende wor po gore po det yirtiŋ, irde barasya ainyabe hora milmulŋeŋya gore po det yirtiŋ goyen damu titek bere gobe gogo hubu hihi yeŋ goke esiŋayiŋ. ¹³Irde miyow, biŋge hapek yirtek det, irde det kumga tike hamiŋ igiŋ forok yeŋ haŋyen goyen, irde he fimiŋ hamiŋ igiŋ wor po kurayen kurayenyabe, wain, olip fimiŋ, palawaya witya igiŋ muŋ wor po, bulmakaw, sipsip, hos, irde nima hos beleŋ yuluŋ teŋ haŋyen goyabe, meteŋ mar dulŋeŋya goyen damu titek bere gobe gogo hubu hihi yeŋ goke esiŋayiŋ. Go mar gobe alya bereya kura meteŋ mar yirde bere go unke damu teŋ hiyeŋ.

¹⁴“Go mar goreb bere go kamke keneŋbe, ‘Det igiŋ yawareŋ yeŋ nurde hayen kurun gobe gigeŋ kamkeb hubu hihi. Samuŋgeya detge igiŋ wor poya goyen tumŋaŋ yubul taha geb, epte ma sopte yenayiŋ!’ innayiŋ.

¹⁵Samuŋ ya miŋyaŋ mar bere gore detmiŋ damu tike horam yaŋ heŋ haŋyen mar gobe bere goyen uliŋ misiŋ kurun po kateŋ hike keneŋbe kafura wor po heŋ tubul teŋ gisaw po hinayiŋ. Irde bere goke eseŋ obam teŋbe, ¹⁶‘Kafuram wor po! Kafuram wor po! Awo, Taun kurun. Taun gobe bere gogo, yeŋbe amil igiŋ bukkeŋya digulakya suluk yirtiŋ goya bukkeŋhel yitiŋ goya hor yirde hiyeŋ. Irde golya hora kusamuŋ wor poya pal hora selweŋ yara damum hende wor po goya goyen yade uliŋ umŋa teŋ hiyeŋ. ¹⁷Goyenbe samuŋmiŋ kurun gobe bemel po hubu hihi!’ yenayiŋ.

“Ningeb hakwa doyan yird yird marte karkuwanmin, irde alya bereya hakwa hende kun han mar, hakwa hende meten ten han maryabe makan alare hen dapna yade hora ten han marya tumnan bere go tubul ten gisaw po hinayin. ¹⁸Mel gore bere go humga kun hiyen gote kakim kenenbe kuware po, ‘Bikenbe taun kurun wor po gahade gayen kura ma hinhin!’ yenayin. ¹⁹Irdeb bere goyen kamde hinhin goke bin misin nurdeb yingen de tonande mulowo wogordeb esen obam tenbe, ‘Kafuram wor po! Kafuram wor po! Awo, Taun kurun. Taun bana gon al kura hakwa minyan mar gobe taun gote samunya detmin hakwamin hende yawanbe hora kurun yade hanjen. Goyenbe bemel po taun gobe detmin goya tumnan mugol nihi!’ yenayin. ²⁰Gega Al Kurunyen gasunde han marbe bere go kamde hi goke aman henayin. Den Al Kurunyen alya bereya aposelya porofetyabe bere gore bulun bulun dirtin goyen goke merem yan irtin goke aman henayin!” yirin.

²¹Be, go kamereb Al Kurunyen miyon kura sanjmin kurun wor po goreb hora kurun kura goyen tenbe makan alare timiyyin. Hora gote kurunminbe wit bilmin karka ten palawa irde hanjen hora kurun wor po hos belen tulun ten hanjen go gwahade goyen. Be, Al Kurunyen miyon gore hora go temeydeb, “Hora kurun go makan ala bana kurka gwahade goyen po, ge Babilon taun kurun goyen gad gemeyke makan ala bana kurkun sopte ma po forok yawayin. ²²Tikin de nin det hap inen hanjen gote tikin, buleunyen tikin, bigulyen tikiyabe al belen tikin hen hanjen tumnan goyen go ma sopte nurayin. Irde samun yare meten ten han mar manan sopte ma yenayin. Wit bilmin karka ten palawa ird ird gote hora migirin manan sopte ma po nurayin. ²³Hulsi melak kura ge bana sopte melak ma henayin. Tikin merere nin tikin sopte ma po nurayin. Ge Babilon taun bana gon samun ya minyan marbe hora ten ten sanjmin kurun wor po. Gega ge belen merebal matare mata bulun forok irde alya bereya megen hike kwa kurun goyen usi yirarin. ²⁴Taun gobe Al Kurunyen alya bereya, irde porofet, irde alya bereya megen hinhan goyen gasa yirke kamamin kurun gote murungem tihibe gago humga kwa,” yirin.

19 ¹Be, go kamereb Al Kurunyen gasunde al buda kurun kura belen kuware gaha yeke nurmirin: “Haleluya, Al Kurun turun irnin! Al Kurunbe Dumulgan ten ten Al, denembe turun yan wor po, tarehmin manan kurun wor po. ²Yen belen alen mata yenen igin ma bulun yinen yinen gobe huwak irde fudinde mat ten hiyen. Al Kurunbe belen nin bere gore lelep matamin de alya bereya megen han kurun gayen bulun yiriyin goke merem yan ira. Irde bere gore Al Kurunyen meten mar gasa yirke kamamin gote wolminen ira,” yamin. ³Be, gwaha yenbe sopte po, “Haleluya! Bere go humga kun hi gote kakimbe gwahader hurkun hiyen,” yamin.

⁴Be, gwaha yekeb Al Kurunyen alya bereyat doyan marte parguwak 24 goya det binfut minyan sipteya gore wulgurut yen Doyan Al Kurunyen gasunde keperde hi al Al Kurun goyen doloŋ iramiŋ. Irdeb kuware po, “Fudinde wor po! Al Kurun turun irniŋ ko!” yamiŋ.

⁵Irkeb go kamereb al melak kura Doyan Al Kurunyen keperd keperd gasunde mat forok yenbe gaha yiriŋ: “Deŋ Al Kurunyen meten mar, Al Kurunniŋ turun irnaŋ. Deŋ al deŋem yanya deŋem monya Al Kurun kafura irde haŋ marbe turun irnaŋ!” yiriŋ.

⁶Irde go kamereb al buda kurun beleŋ kuware mere tike nurmiriŋ. Meremiŋbe kurun wor po, fe kurun hamulare solok yen kateŋ migiriŋ ten hi yara, irde daga kateŋ hi yara nurmiriŋ. Meremiŋbe gahade: “Haleluya! Al Kurun turun irniŋ ko. Al Kurunbe Doyan Al Kurun tareŋmiŋ kurun wor po. Yen po ga det kurun gayen doyan yirde hi. ⁷Sipsip dirneŋ bere ten ten nalu forok yeke bere¹ gobe goke gitik titiŋ hi. Ningeb goke igiŋ po nurde aman heŋbe deŋem turun yan irtek! ⁸Amil igiŋ wor po wukkek irde milmulken goyen hor ird ird niŋ bere goyen untiŋ. (Amil igiŋ gobe Al Kurunyen alya bereyat mata huwak niŋ yitiŋ.)

⁹Be, go kamereb Al Kurunyen miyoŋ beleŋ ninyiŋ. “Mere kura gahade kaya: ‘Sipsip dirneŋ goyen bere ten ten gote dula matare wanayiŋ marbe aman henayiŋ,’ kayayiŋ,” ninyiŋ. Irde sopte, “Mere gabe Al Kurunyen mere fudinde wor po,” ninyiŋ.

¹⁰Gwaha ninkeb kahaŋ minde kateŋ doloŋ ireŋ timiriŋ. Irkeb, “Gwaha ma nirayiŋ! Ne wor ge yara po Al Kurunyen meten al geb. Kadge yago Yesuyen mere gama irde haŋ mar gwahade yara po geb. Yesuyen merebe porofet beleŋ Holi Spirityen saŋinde yitiŋ geb, Al Kurun po ga doloŋ irayiŋ!” ninyiŋ.

Hos faykek hende kipirtiŋ al

¹¹Be, go kamereb Al Kurunyen gasunde niŋ yame hol yekeb hos faykek kura hike kinmiriŋ. Hos go hende kipirtiŋ hinhin al gote deŋembe “Biŋde mat fudinde meten ten ten al, irde Mere Fudinde ten ten al”. Yen beleŋ alyen mata igiŋ ma bulun yineŋ fulena ten hiyen gobe mata huwak mat gwaha ten hiyen. ¹²Al gote diliŋbe kak melak yara, tonaŋdebe doyan al kurunyen tonaŋhor budam haŋ. Irde deŋe kura uliŋde katiŋ hi gega, deŋe goyen al hoyanbe go ma nurde haŋ, yingeŋ po ga nurde hi. ¹³Yenbe amil ulyan dari bana kirtiŋ goyen hor irtiŋ hi. Al gote deŋembe “Al Kurunyen Mere.” ¹⁴Al Kurunyen gasunde niŋ fulena mar beleŋ al go gama irde hinhan. Mel gobe amil igiŋ wor po faykek irde wukken goyen hor yirde hos faykek hende keperde kame gama irde hinhan. ¹⁵Meheŋ heŋ hinhin al gote mohon bana matbe fulenare niŋ bidila misiŋ yan kura wan

¹ 19:7 Bere gobe Yesuyen alya bereya sios niŋ yitiŋ.

hinhin. Bidila gobe naja karkuwan karkuwan bana han mar gasa yird yird niƙ mohonɗe hinhin. Yen beɓen naja karkuwan karkuwan goyen doyan al kurunyen kutum ain beɓen po irtin goyen tanarde doyan yirde hikeb kafura henayin. Irde mel goke Al Kurun saninmin kurun wor po hi gore bearar ten hiyen goyen yikala yire yen wain karka ten fimin gilyan hitin yara yiryen. ¹⁶Amil hor irtin go hendeya bulhekdeyabe deƙe kura gahade katin hinhin:

MEGEN NIƙ DOYAN MAR KARKUWANɗE KURUNMIN, IRDE DOYAN
MARTE KURUNMIN

¹⁷Be, gor mat Al Kurunyen miyon kura naja diling hende huwarde hike kinmirin. Yen beɓen kuware po nu kurayen kurayen naja kota foy ten kun hinhin kurun goyen yinyin. “Wanan. Wan Al Kurunyen dula mata kurunɗe gar gabu irnan. ¹⁸Gogab megen nin doyan mar karkuwan, fulen marte karkuwanmin, al tareɓ minyan mar, hosya go hende keperde kun han marya gote hakwam gote gason talde nenayin. Al tumnan, al dufayminɗe kun han marya meten mar dulɓenya, irde al deƙem yanya deƙem monyat hakwam gote gason nenayin,” yinyin.

¹⁹Be, gor matbe dapna duwi kafuram goya megen nin doyan mar karkuwanɗabe fulen marminya beɓen hos faykek hende kipirtin hinhin al goya fulen marminya arnin yen gabu irde hike yinmirin. ²⁰Goyenpoga dapna duwi kafuram gobe ten fere tiyamin. Porofet falkuk dapna duwi kafuram goke tenbe mata tinen turun yan forok yirde hinhin al goyen wor yenna tumnan fere titin po hinaryum. Usi porofet gobe mata tinen goyen forok yirde alya bereya dapna duwi kafuram gote deƙem ulinɗe ten dapna gote toneɓ irtin det goyen doloɓ irde hinhin mar usi yirde hinhin. Ninɓe dapna duwi kafuram goya porofet falkukya gobe diling gergen hikeya salfa hora humga kun buk yen fe ala yara hitin bana gon yemeyamin. ²¹Fulen marminbe fulenare nin bidila hos faykek hende hi al gote mohon bana mat wan hinhin gore po gasa yirke kamamin. Irkeɓ nu tumnan wan gason talde nene bin makin hamin.

Dama 1,000

20 ¹Be, gor matbe Al Kurunyen miyon kura gasunminɗe mat katen hike kinmirin. Yenbe Mete Dukun wor po kimyan minmon bana kurkun kurkun yame goyen hol ird ird ki minyan. Irde haninɗebe sen kurun wor po kura tanartin manan. ²Yen beɓen deregon goyen tirin. Deregon gobe kunere bikken hinhin go goyen. Gote deƙembe Ungura, kurabe Satan inen hanen. Be, Al Kurunyen miyon gore Satan goyen dama 1,000 gwahade fere titinɗe hiyen yen ten fere tiyyin. ³Irdeɓ Satan goyen Mete Dukun wor po bana temeydeb mete gote yame tan kin urdeb al kura beɓen epte ma hol irnayin yen Al Kurunyen deƙere son iryin. Gogab dama 1,000 bana gon Satan beɓen epte ma alya bereya megen

haɲ kurun goyen usi yiryen. Dama 1,000 go hubu hekeb Satan go sinjare katyen. Goyenbe ulyande ma hiyen.

⁴Be, gor matbe alya bereyat mata go yenen igin ma bulun yinen yinen taren minyan marte keperd keperd gasun yinmirin. Irde Yesu Kristu nin tagalde Al Kurunyen mere sanjin po tanarde hike goke al beleɲ igin ma nurde binjin walke kamamin maria gote toneɲ yinmirin. Mel gobe dapɲa duwi kafuram goyen ma doloɲ iramin. Irde dapɲa duwi kafuram gote denem kiminde wet ma haniɲde wet goyen ma katin hinhan. Mel gobe kamtinde mat huwardeb dama 1,000 bana gon doyan mar heɲ Yesu Kristuya megen gayen doyan irde hinhan. ⁵Ningeb Al Kurunyen mere tanarde heɲ kamamin mar go mun po huwarnayin. Munan al kamtin goyen hoyanbe dama 1,000 goyen hubu heke gab huwarnayin. Mata gobe al kamtin mar mehenɲde huwarnayin go goyen. ⁶Al kamtinde mat mehenɲde huwarnayin mar gobe Al Kurun beleɲ guram yirde sanjin yirde wukkek wor po yiryen. Mel gobe epte ma kak alare kunayin. Kak alare kun gon gobe sopte kamde kamde mata go gwahade goyen. Gwaha titɲenbe Al Kurunya Yesu Kristuya doloɲ yird yird mata doyan mar henayin. Irde dama 1,000 bana gon yenya megen gayen doyan yirde hinayin.

Satanbe bulun hiyyen

⁷Be, dama 1,000 hubu hekeb Satan gobe koya bana mat ten sija irke katyen. ⁸Irde megen murun kurhan kurhan kun alya bereya budam wor po usi yiryen. Go mar gobe Gokya Magokya yinen hanjen. Satan beleɲ go mar goyen fulenɲa ten ten nin gabu yiryen. Mel go gabu yirkeɲ makaɲde nin sawsawa yara budam wor po, epte ma kapyan hetek henayin. ⁹Be, go mar gobe bantoto kurun wor po goyen sam irde kunbe Al Kurunyen alya bereya beleɲ keperde haɲ gasun goyen bulun yirin yen milgu yirnayin. Al Kurunyen alya bereya keperde haɲ gasun gobe taun Al Kurun beleɲ goke amanen nurd unen hiyen go goyen. Be, alya bereya Gokya Magokya yinen hanjen mar gore taun go milgu irnayin gega, kak beleɲ nanɲinde mat katen gwamuɲ yuryen. ¹⁰Irkeɲ mel go usi yiryen al Ungura gobe sopte ten salfa hora kak hitin ala bana temeyke hiyen. Kak ala bana gonbe dapɲa duwi kafuram goya porofet falkukya yimiytin haryen. Ningeb Satanya dapɲa duwi kafurama porofet falkukya gobe nanɲahalya wawunya huginen ulin misiɲ kurun po katen hinayin.

Al kamtin goyen Al Kurun beleɲ merere yiryen

¹¹Be, gor matbe Doyan Al Kurun beleɲ keperd keperd gasunmin kurun faykek wor po hende kipirtin hike kinmirin. Megenya nanɲinyabe yen hitte mat busaharyum gega, gor kura kutek mon geb, hubu po haryum.

¹²Irde kamamiŋ mar kurun goyen al deŋem yaŋya deŋem miŋmonya Doyaŋ Al Kurunyen keperd keperd gasuŋ diliŋ mar huwarde hike yinmiriŋ. Gorbe asaŋ hol yirtiŋ hinhan. Irke asaŋ hoyan kura hol yiriŋ. Asaŋ gobe Al Kurunya hugiŋeŋ hitek mar gote deŋem katiŋ asaŋ. Al kamtiŋbe megen heŋya mata teŋ hinhan kurun goyen asaŋ buda goyen bana goŋ katiŋ geb, gor mat mata dahade teŋ hinhan gote muruŋgem tamiŋ. ¹³Makaŋ alare kamamiŋ marya mete titiŋ marya goyen tumŋaŋ merere huward huward niŋ Al Kurun hitte wayamiŋ. Waŋbe megen heŋya mata teŋ hinhan gote muruŋgem yawaramiŋ. ¹⁴Irkeb Al Kurun belen kamde kamde mataya al kamtiŋ yerde haŋyen gasunya goyen kak alare yimiyyiŋ. Kak ala gobe al kamtiŋde mat huwarnayiŋ mar kura sopte hugiŋeŋ kamde kamde gasuŋde kunayiŋ go goyenbe gogo. ¹⁵Niŋgeb al kurate deŋem Al Kurunya hugiŋeŋ hitek marte deŋem asaŋde katiŋ bana goŋ ma hikeb yade kak ala goyenter yimiyyiŋ.

Naŋkiŋ gergeŋya megeŋ gergeŋya

21 ¹Be, gor mat naŋkiŋya megeŋya bikkek gobe hubu hekeb naŋkiŋya megeŋya gergeŋ goyen yinmiriŋ. Megeŋ gobe makaŋ miŋmon. ²Be, Taun Wukken Yerusalem gergeŋ wor po gobe Al Kurunyen gasuŋde mat kateŋ hike kinmiriŋ. Taun gobe bere foŋeŋ kura uŋ belen waŋ tupi teŋ kuŋ kuŋ ge uliŋ umŋa kusamuŋ wor po teŋ haŋyen go gwahade goyen po Doyaŋ Al Kurun waŋ waŋ niŋ gitik titiŋ hinhin. ³Be, go kamereb Doyaŋ Al Kurunyen keperd keperd gasuŋde gor mat al melak kura forok yeke nurmiriŋ. Meremiŋbe gahade: “Gayenter Al Kurun heŋ heŋ gasuŋbe alya bereya haŋde gor hi! Yeŋbe mel goya hiyeŋ. Irkeb mel gobe Al Kurunyen alya bereya henayiŋ. Irkeb Al Kurun yiŋgeŋbe mel goya heŋbe yende Al Kurun hiyyeŋ. ⁴Yeŋ belen alya bereyat diliŋ fimiŋ halde yunyeŋ. Mata bikkeky det bikkekyabe hubu henayiŋ geb, kamde kamde mata hubu hiyyeŋ, irde al kamke eseŋ obam teŋ teŋ mata wor hubu hiyyeŋ. Go ma esinayiŋ, irde uliŋ misiŋ ma katnayiŋ,” yiriŋ.

⁵Be, Doyaŋ Al Kurunyen keperd keperd gasuŋde kipirtiŋ hinhin al goreb, “Det kurun gayen tumŋaŋ gergeŋ wor po yirde hime!” yiriŋ. Irdeb, “Mere gabe fudinde yeŋ nurtek mere geb, asaŋde kaya,” ninyiŋ.

⁶Irdeb gaha ninyiŋ: “Metenebe pasi irhem. Nebe Alfaya Omegaya, det kurun gayen miŋ urmiriŋ al, irde pasi ird ird al. Nebe meheŋde wor po hinhem, irde kame wor heŋ. Al kura fe niŋ yirkeb Al Kurunya hugiŋeŋ heŋ heŋ goyen fe diliŋde mat fe marde waŋ hi yara goyen yuneŋ. Fe goyen yuneŋbe damu tinaŋ ma yineŋ, duliŋ yuneŋ. ⁷Al kura al buluŋ fole iryeŋbe det gergeŋ hitiŋ kurun goyen tumŋaŋ yawaryeŋ. Irke nebe yende Al Kurun hemekeb yeŋbe diriŋne hiyyeŋ. ⁸Gega kanduk forok yeŋ yeŋ ge kafura heŋ haŋ mar, Al Kurun niŋ dufaymiŋ tareŋ ma irde haŋ mar, dufay buluŋ heŋ haŋ mar, al gasa yirke kamde kamde mar, leplep

mata tej haɲ mar, merebal kurayen kurayen yirde haɲ mar, det tonen yirde doloɲ yirde haɲ maryabe, usi marya gote heɲ heɲ gasuɲbe salfa hora humga kuɲ fe ala yara hitiɲ bana goɲ po hinayiɲ. Gor kunayiɲ gobe kamtiɲde mat huwarnayiɲ gega, sopte hugiɲen kamde kamde gasuɲde kunayiɲ go goyenbe gogo,” yiriɲ.

Yerusalem gergeɲ

⁹Be, Al Kurunyen miyoɲ 7 mata kafuram 7 kuwe bana hitiɲ 7 goyen kura tanarde hinhin miyoɲ goreb, “Wake kure. Kuɲ Sipsip dirɲen gote berem gikala girenɲ,” ninyiɲ. ¹⁰Irdeb Holi Spirit beleɲ ketal nurke nade dugu kurun hende hoyan wor pore gor nukun Taun Wukkek wor po goyen nikala niryiɲ. Taun Wukkek wor po gobe Yerusalem gergeɲ Al Kurunyen gasuɲde mat kateɲ hinhin. ¹¹Taun kurun gobe Al Kurunyen saɲiɲ turunɲ yaɲ wor po gore hulsi melak yara agat uryiɲ. Agat uryiɲ gobe hora kusamuɲ wor po beleɲ tej hanɲen yara tiyyiɲ. Yaspaya kristal wukkenɲa yara agat wor po uryiɲ. ¹²Taun gobe koya kurun miliɲ hende hoyan wor po beleɲ milgu irtiɲ. Koya gobe yamemiɲ 12 miɲyaɲ. Yamere gorbe Al Kurunyen miyoɲ 12 hinhan. Yame 12 go hendebe Israel marte al miɲ 12 gote deɲem katiɲ hinhan. ¹³Yame 12 goyen karwobe naɲa waɲ waɲ beleɲ hinhan. Irde karwo kurabe naɲa kurkur beleɲ hinhan. Irde yame karwo kurabe gegelhek kurhan hinhan, munaɲ karwo kurabe kurhan hinhan. ¹⁴Koya kurun gobe hora karkuwaɲ 12 go hende yirtiɲ. Hora karkuwaɲ 12 go hendebe Sipsip dirɲen gote mere basan mar aposel 12 gote deɲem katiɲ hinhan.

¹⁵Be, Al Kurunyen miyoɲ neya mere tiyaryum gore taunya koya, irde yamemiɲa gote kurunmiɲ tunan tiye yenbe tunan tej teɲde niɲ kutum gol beleɲ irtiɲ goyen haniɲde tanarde hinhin. ¹⁶Taun kurun gobe murun sipte miɲyaɲ. Sobammiɲa pelyenmiɲyabe tunande wor po. Al Kurunyen miyoɲ beleɲ kutum go tej taun kurun goyen tunan tej kenenbe ulyanmiɲbe 2,200 kilomita, irde pelyenmiɲa huwa hurkutiɲa wor gwahade po. ¹⁷Yen beleɲ taun gote koya tolokmiɲ tunan tiyyiɲbe 65 mita. Miyoɲ gore tunan tiyyiɲ gobe megen niɲ det gote kurunmiɲ tunan tej teɲde niɲ kutum teɲbe tunan tiyyiɲ.^m ¹⁸Yerusalem taun gergeɲ gote koyabe hora kusamuɲ kura yaspa inen hanɲen gore po irtiɲ. Irde taun gobe gol beleɲ po irtiɲ. Gol gobe galas yara tikiɲ miɲmonɲ, wukkenɲ wor po. ¹⁹Irde koya gote miɲbe hora kusamuɲ wor po kurayen kurayen gore yade umna yirtiɲ. Koya gote miɲ 12 bana goɲ meheɲdebe yaspa hora

^m 21:17 Al Kurunyen miyoɲ beleɲ megen niɲ det gote kurunmiɲ tunan tej teɲde niɲ kutum tej Al Kurunyen gasuɲde niɲ Yerusalem gote kurunmiɲ tunan tiyyiɲ gobe Yon beleɲ kenen bebak tej tej ge gwaha tiyyiɲ. Niɲgeb “kilomita, mita” gobe neɲ al beleɲ bebak tej tej ge po, Yerusalem kurunmiɲ fudindebe epte ma nurtek.

beley irtin. Kamere nin min gobe sapaia hora beley irtin. Karwominbe aget hora, sipteminbe emeral hora, ²⁰siptesononminbe sadonikis, 6minbe hora bukken konilian, 7minbe hora wulsakken krisolait, 8minbe hora digulak yara beril, 9minbe hora wulsakken yara topas, 10minbe krisopires hora, 11minbe haiaasin hora, funan 12minbe ametis hora beley po umna yirtin hinhan. ²¹Koya gote yame 12 gobe pal hora karkuwan wor po selwen yara gore po yirtin. Yame goyen unjkuren unjkurenbe pal hora unjkuren unjkuren beley po yirtin. Taun kurun go bana gonj nin beleybe gol beley po yirtin. Gol gobe tiki minmon galas yara wukken wor po.

²²Be, taun bana gonjbe Al Kurunyen ya balem kura ma kinmirin. Ya balem gobe hoyan mon, Kuruninin Al Kurun taremin kurun wor po goya Sipsip dirnenya yingenbe ya balem go goyen geb, gogo kura ma kinmirin. ²³Taun bana gonjbe Al Kurunyen taremin turun yan wor po gore hushi melak hen agat urde hiyen gwahade po ten hikeb nanaya gagasiya nin ma nurde han. Taun bana gonj nin hushibe Sipsip dirnen gogo. ²⁴Taun gote hushi goyen temeykeb nana karkuwan karkuwan bana han marbe taun gote hushire kun hinayin, irde megen nin doyan mar karkuwan beley samunmin igin wor po goyen taun bana gonj yade wanayin. ²⁵Taun bana gonjbe wawun minmon geb, taun gote koya yamebe huginen hon hinayin. ²⁶Alya bereya nana karkuwan karkuwan bana han gore samunmin igin wor poya horamin ya yad taun bana gonj hurkunayin. ²⁷Goyenbe det kura Al Kurun dilinde wukken monbe taun bana gonj epte ma yad hurkunayin. Irde al kura mata memyak ten han marya usi mata ten han maryabe epte ma taun bana gonj hurkunayin. Gwahade yarabe Al Kurunya huginen hinayin marte denem katin asande denem han mar go po hinayin. Asan gobe Sipsip dirnen gote asan.

Al Kurunya huginen hen hen sanjin minyan fe kurun

22 ¹Be, gor matbe Al Kurunyen miyon gore Al Kurunya huginen hen hen sanjin minyan fe kurun goyen nikala nirke kinmirin. Fe gobe galas yara wukkek wor po, irde Al Kurunya Sipsip dirnenyat keperd keperd gasunde mat katen hinhin. ²Irdeb taun bana gonj beley kurunmin kahalan gama irde kun hinhin. Fe goyen sina kurhan kurhanbe he kura iginen nene Al Kurunya huginen hen hen he go hinhan. He gote iginenbe dama unjkuren bana wawun 12 gwahade iginen hen hiyen. Gagasim gagasim turte iginen hen hiyen. Irde he gote yuwalnenbe alya bereya nana karkuwan karkuwan bana han mar gote garbam sope ird ird tare minyan. ³Taun bana gonjbe det kura Al Kurun beley karan yurtenbe gonj ma hinayin. Irde Al Kurunya Sipsip dirnenyat keperd keperd gasunde taun bana gonj hiyen. Irdeb meten marmen beley meten ten yunen hinayin. ⁴Mel gobe Sipsip dirnen gote kimin kennayin, irde denembe mel

gote kimiŋde katiŋ hiyeŋ. ⁵Taun bana goŋbe wawuŋ miŋmoŋ hiyyeŋ. Irde Al Kurunbe Doyaŋ Al Kurun geb, tareŋmiŋ turnuŋ yaŋ gore hulsi yara heŋ agat urde hiyeŋ. Irkeb hulsiya naŋaya niŋ ma nurde hinayiŋ. Mel gobe gwahader taun bana det kurun goyen doyaŋ yirde hinayiŋ. ⁶Be, Al Kurunyen miyoŋ goreb, “Mere gabe fudiŋde, irde hekkeŋ nurtek hi. Doyaŋ Al Kurunbe mere basaŋ marmiŋ gote toneŋde Al Kurun. Yeŋ beleŋ heŋ ga ma mata kura forok yenayiŋ goyen meten marmiŋ yikala yire yeŋbe miyoŋmiŋ teŋ kerke katiŋ,” ninyiŋ.

Yesube wayyeŋ

⁷Be, Yesu beleŋ gaha yiriŋ: “Ga nurnaŋ! Nebe heŋ ga ma wayeŋ! Al kura Al Kurun beleŋ kame mata dahade forok yiryen goke asaŋde gar katiŋ mere gayen gama irde haŋ marbe Al Kurun beleŋ guram yirde saŋiŋ yiryen!” yiriŋ.

⁸Be, ne Yon gabe mata kame forok yenayiŋ kurun goyen nikala nirde momoŋ nirtiŋ goyen nurmiriŋ, irde kinmiriŋ. Gwaha teŋbe Al Kurunyen miyoŋ mata go nikala niryiŋ al goyen doloŋ ire yeŋ kahaŋ miŋde wulgurut yimiriŋ. ⁹Gega miyoŋ goreb, “Gwaha ma nirayiŋ! Ne wor ge yara po Al Kurunyen meten al geb. Nebe geya kadge yago porofetya mere asaŋ gayen bana katiŋ gayen gama irde haŋ marya goyen yara po geb. Niŋgeb Al Kurun po doloŋ irayiŋ!” ninyiŋ. ¹⁰Irdeb gaha ninyiŋ: “Al Kurun beleŋ kame mata dahade forok yiryen goke asaŋde gar katiŋ mere gate igineŋbe heŋ ga moŋ forok yenayiŋ geb, asaŋ gayen taŋ saŋiŋ ma irayiŋ. ¹¹Irde al kura mata buluŋ teŋ haŋ marbe yubul tike gwahade po teŋ hinayiŋ. Al kura dufay buluŋ po gama irde haŋ mar wor yubul tike gwahade po teŋ hinayiŋ. Irde al kura mata huwak teŋ haŋ marbe yubul tike gwahade po teŋ hinayiŋ. Al kura mata wukkek teŋ haŋyen mar wor yubul tike gwahade po teŋ hinayiŋ,” ninyiŋ.

¹²Irdeb gaha yiriŋ: “Ga nurnaŋ, nebe heŋ ga ma wayeŋ! Waye yeŋbe al haŋ kurun goyen mata daha daha teŋ hitiŋ gote muruŋgem yawaŋbe yuneŋ. ¹³Nebe Alfaya Omegaya, det kurun gayen miŋ urmiriŋ al, irde pasi ird ird al. Nebe meheŋde wor po hinhem, irde kame wor heŋ.

¹⁴“Be, al kura amil halde haŋyen yara matamiŋ wukkek yirde haŋ marbe Al Kurun beleŋ guram yirde tareŋ yiryen. Go mar gobe nene Al Kurunya hugineŋ hitek he igineŋ goyen igiŋ netek haŋ. Irde taun kurun gote koya yame bana igiŋ hurkutek haŋ. ¹⁵Gega taun go siŋarebe Al Kurunyen mere tubul titiŋ mar hinayiŋ. Go mar gobe merebal kurayen kurayen yird yird mata teŋ haŋ mar, leplep mata teŋ haŋ mar, al gasa yirke kamde haŋ mar, det toneŋ doloŋ yirde haŋ mar, irde usi mereya mataya niŋ amaŋeŋ nurde haŋ mar kurun gobe taun siŋare hinayiŋ.

¹⁶“Ne Yesu gare deŋ alya bereyane sios goyen merene momoŋ dird dird niŋ teŋbe miyoŋne teŋ kermeke kurkuŋ. Nebe Dewityen miŋde mat

watiŋ geb, nebe Dewit Urmiŋ. Irde nebe Bayfoŋ agatŋeŋ kurun wor po go goyen,” yiriŋ.

¹⁷Be, Holi Spiritya siosya beleŋ, “Wanaŋ!” yaryum. Irkeb al kura mere go nuramiŋ mar wor, “Wanaŋ!” yamiŋ. Fudinde, al kura hugiŋ hitek fe niŋ kamde haŋ marbe waŋ fe go nenayiŋ. Fe gobe al kura goke nurde haŋ marbe damum moŋ duliŋ nenayiŋ.

¹⁸Be, ne Yonbe Al Kurun beleŋ kame mata dahade forok yiryen goke asaŋde katiŋ mere gayen nurtiŋ mar goyen gahade hayhay yirde hime: al kura mere ga hende hoyan kura sopte kiryen al gobe Al Kurun beleŋ asaŋ gayen bana mata kafuram gwahade forok yenayiŋ yitiŋ goyen al go hende forok iryen. ¹⁹Irde al kura asaŋde gar katiŋ mere kura teŋ siŋa iryen al gobe nene Al Kurunya hugiŋeŋ hitek he igineŋ goyen netek mar haŋ bana goŋ mat Al Kurun beleŋ teŋ siŋa iryen. Irde taun wukken wor po goke asaŋde gar katiŋ taun bana goŋ epte ma hiyen.

²⁰Be, mata forok yenayiŋ kurun gayen kawan po tagalde hi al gore, “Gwaha, fudinde wor po, nebe heŋ ga ma wayen,” yen hi.

Gwaha, Doyan Al Kurun Yesu, wayayiŋ!

²¹Doyan Al Kurun Yesu beleŋ Al Kurunyen alya bereya buniŋeŋ yirde igiŋ igiŋ yirde hiwoŋ yen gusuŋaŋ irde hime. Fudinde wor po.